

卷施閣集

冊六



卷施閣詩卷第七

陽湖洪亮吉著

緱山少室集 乙巳至戊申

寒食自潼關至閩鄉道中書懷二首

塵欲浮冠浪拍肩未成寒食賣錫天兼程驛路猶飛雪是日大風隔

岸山村乍禁烟舊友別來逾二稔晤風陵渡名花看盡入中年匆匆

節序渾難遣柳葉牽人到酒邊

一種人間未了愁杏花斜月屋西頭都無芳草能迷徑只有閒雲易

上樓金釧影移籠畫軸玉簫聲徹動簾鉤殘宵舊夢何時醒門外黃

河拍岸流

出關日先東畢侍郎

花暗長堤草覆汀上坡楊柳接天青半春移節來關外一路傳書向

驛亭管下名山皆有嶽坐中奇士盡談經報公欲著河防略燭跋更

殘手未停

清明後一日憩靈寶東二十里風雪寺作

馬上游絲拂面過匆匆寒食奈愁何鶯花已逐華年去風雪偏于岐
路多石鼎水清勞更瀹壁苔碑暗費親摩重來綠髮蕭疎甚入定枯
僧鬢亦皤

緱山道中夢遊仙詩

嬾跨茅龍上玉京新涼踏月海中行回頭碣石都無影移得黃河近
洛城

真誥親繙太古前容成展上本齊肩吹笙歲月三千載子晉還稱後
輩仙

三度人間謫乍還玉虛容易綴仙班淮南雞犬偏無劫穩住紅雲碧
落間

來往閒雲不定方莫遊西海曉扶桑玉龍行雨都無暇驅作羣仙代

步忙
八駿前頭一鶴翔
步虛聲引玉鏗鏘不誇帝繫誇仙繫
幾度瑤池侍穆王
上界仙人住杳冥
閒來紫府鬥心靈
青天大似彈碁局
空裏時聞有落星

裁雲片片作窗紗
銀漢西頭織女家
天上晝閒無個事
隨風時唾碧桃花

自檢名山結靜緣
藥爐丹竈火陰然
忽然萬里紅雲破
流下仙人濯足泉

太室峯連少室高
黃河空裏影迢迢
緱山幾尺神仙地
引得羣神日夕朝

蕭史吹簫子晉笙
半空鸞鶴鳳凰聲
神仙一例都年少
白髮無從住玉京

天都逐便訪浮邱更向空同石室遊鶴背乍涼還乍暖不知人世幾
春秋

閒童五百執香爐玉節新從紫府除碑石拂雲都嬾看神仙不習漢
唐書

紫府三層碧玉臺曉雲濃處百花開蒼龍白虎司天闕却放騎驢道
士來

妙義同參帝釋居龍華會上集簪裾忽然海水浮天去無數星官盡
跨魚

秋半天中看月華廣寒宮闕泛浮槎玲瓏玉樹交無影空裏聞香不
見花

天上仍攜古錦囊依然覓句擅詞場都緣長爪仙人少勅取麻姑降
李郎

膠舟南邁世人憐傳說昭王作水仙畢竟上蒼忠厚報一家眷屬總

昇天

采樵三日入烟深絕嶺分明屐齒橫再轉一山雲氣隔松花如雨落

琴聲

遊戲東池采碧蓮被風吹得髻斜偏倦來只踏飛鴉影却訝羅裙黑

半邊

詔書新降玉霄宮南下關門啓數重敕取海魚三百尾放來天漢待

成龍

借得仙雲一片平展來如席睡難醒多因夢重雲頭落閣在松風盡

處亭

金闕南頭奏玉牋薦將師曠更司天神光豁處雙眸炯曾見仙人總

角年

天帝分明築外臺琪花瑤草勅齊栽裴家玉杵温家鏡挈取神仙眷

屬來

洗馬清談庶子狂勅來仙案與司香才名畢竟人天重詔冊仍徵白
侍郎

共守東皇藥竈邊傳言玉女試金仙回眸不語拈花笑一夕都生離

恨天

駕鳳閒來碧海潯霜柑偷食近千林都因橘債償難滿強得天公爲
兩金

玉妃兩兩鬥新粧騎鶴公然下界翔却灑黑塵迷世眼不教親切見
衫裳

童顏如玉髮齊肩自守丹爐五百年騎得石牛偷下世一生不願做
頑仙

怪得雙成玉手溫樽桑二日弄朝暎鯨魚死後滄溟漲添得天南綠
一痕

嶽瀆羣神賀正回玉皇高拱坐層臺虛窗亦養紅鸚鵡慣迷人間瑣

事來

無多識字便成仙
香案惟留易一編
詔取洛陽王輔嗣
茅亭重與論
先天

上方光景若飛烟
臺殿空明徹四邊
三十一天無月看
月輪只照兩
重天

憫旱

鎮日帷車坐偏愁
雲氣晴客行殊望
雨敢說爲蒼生
兩歲多憂旱山田
赤地多到秋霖雨
集瘠土更防河
百車汲井華縷斷
水亦竭辛苦野人
言殘冬已無食
三月黃花少蓬蒿
積菜園殘燈山館
夜殊復愧傳餐
巖侍讀長明屬賦
歸求草堂十二詠

思話軒

我愛思話軒
默坐久無侶
香草一尺深
秋蟲自相語

冬讀書室

寂然冬讀書一夕抵一歲若及三十年便足一萬載

知白齋

坐臥知白齋萬卷閱金石墨氣升作雲寥寥室生白

過雲室

一室名過雲籤軸紛滿架掩卷看青天雲生亦如畫

蒲盧學舍

學舍名蒲盧萬事取相類只恐劉真長當今本無輩

知魚檻

濠梁靜觀久自謂能知魚魚相忘江湖豈復知有余

賓竹廊

長廊列篔簹此君無不可他日或生孫大父行屬我

目聯臺

言登目聯臺四望各百里身世忽若浮大江流足底

茶塢

我尋茶塢來茶味如在口倘欲邀狂生壚旁合呼酒

兼山

拳石有山名石勢殊卓犖如許山不看出門遊五嶽

白兔泉

泠泠白兔泉石闌高一尺倘值梁王賓應繙兔園冊

小香林

寒深香意遲夢破花枝小無數鶴飛來江南春正曉

孫大自句容來貽我二石刻喜甚各賦一詩

吳衡陽太守葛君碑

君歸止三月我夢已百回君來打門夢初破破夢不我孫吳碑我聞
黃龍年赤烏日一縣神仙都姓葛麤沙大石人弃之取以作碑奇字突

鴻臚冷卿倘哲昆南海傲吏稱文孫羅浮章上罷官急遠遜衡陽政
聲立試問鄴湖酒一甌何如句漏砂千粒君不見葛君碑在縣西縣南
英英祀達奚縣南有達奚將軍廟莫能得其本末將軍夜半過太守賀爾石傳名不朽

梁天監十五年井銘

祇園近小池一雨沒深井

井在句容崇明寺側余乙未年客句容與孫大等時遊焉

我看紅荷花

時餐井華冷井闌危坐無虛日詎識足邊奇字出孫郎為別百年苔

楷法棱棱三十一蕭家半壁江山麗塔高參天井入地

寺有塔甚古相傳六朝時

建清和月後天驕陽千乘萬騎來皇皇淨名釋後兼好道去訪宰相

華陽岡此時淮堰成逾月

梁書天監十五年四月淮堰成

萬井森森植枯骨仁心詎

惜六州民却憫居人道旁渴茅山道士鳩工徒作井十五遵臺符一

亭覆一井一井深百尺行人如願飲甘泉宗廟反憐非血食尋源知

味不可忘欲蓋石屋名蕭梁興亡一瞬中都付塔鈴語更喚井底龍

亭前作飛雨龍言守石已千年奇石既顯龍升天

胡民部文銓蔣公子光世招飲相國寺

已拚泥飲度蕭辰紅樹前頭忽覺春
偶語乍來窺檻鵲高枝偏隱上
樓人相看舊雨都如夢更展屏風已隔塵
幾曲艷歌歸去晚碧流離
瓦綻星辰

籠街紅燭照歸鞭書記平安有報牋
天放薄寒醒宿酒人傳太白是真仙
隔坊宛轉猶聞曲上馬慵騰祇欲眠
明日戟轅傳勝事哦詩聲徹曉鐘前

贈陸民部鐘卽送入都

去秋同侍鹿鳴筵二百人中最少年
通籍早司金穀重趨庭還羨采
衣鮮機雲洛下東西屋韋杜城南尺五天
今日送君春正好青門遙望紫絲鞭

聞謝大令聘由固始擢守鄭州却寄

太傅園亭我下帷早年蹤跡鎮追隨
綦爭別墅心尤競詩學春坊格

未卑王庶子大鶴

製錦乍來遺愛里栽棠留伴叔敖碑同官尚有吹

笙侶留滯天南報最遲謂屠大令紳

自密縣至登封謁嵩高山留山下三日徧遊嵩陽書院及少林寺回

塗訪三石闕

中牟及鄭州風黑已三日行經大魏山谷險忽距轍天青被原野氣
候亦殊別十里輒一亭穿雲到新密山光時破碎風捲出林栗一谷
石若羊高下嚙馬膝地肥巒翠暖村叟袂衣出馬尾別大魏馬首揖
太室洗眼洧水濱看山庶真切

四面各萬里茲山天當中言尋古圖書名號有獨崇足踏河洛流背
與三塗通赤日照上方正如心在胸誰云無神仙軒昊已築宮天帝
湯沐饒嵩陽與登封自非雨露殊何以歲屢豐是冬大不見長松枝

亦扇天門風

登封壇處南外方祠在北惟留少室峯割作化人宅少林寺祠前一

株柏屋外太古石言從天地始便已挺孤直軒轅兩七晝堯代雪三尺倘欲與細論長風閃林黑

太室少室闕開母季度銘茲文在世間一字一列星我來遊嵩高兼謁縣吏庭覓得數榻工南北敢暫停如援升松梢先剝苔蘚青聞聲不見人墨汁樹杪零三日始畢工爲文謝山靈字旣徑寸奇文亦比六經牛車馱百張回鋪草玄亭

自少林寺攜僧欲登少室峯以積雪不得上還憩子晉峯待月

山空無定影雲白亦疑花坐待轆轤月聊烹塢院茶曾聞餌雲母誰解贈丹砂五岳此遊四還家鬢未華

余曾謁真定恆山及六安霍山壬寅秋復陟太華與此而四

送王大令復之官臨漳兼寄楊州牧芳燦伏羌徐州倅書受太康

函關西去川原古下第六旬行役苦

余以甲辰報罷後入關始與君訂交

是時君爲短

主簿夷門東來景物澄河浪三月方飛騰是時人呼聾縣丞君才作賦尤可傳景龍才人王子安競爽遠有楊盈川卽論詩筆亦擅場鄴

下首溯登樓王作配乃有徐偉長梁園賓客嘉書記才子爲官亦游
戲却被人呼作仙吏君不見神仙吏不可忘楊伏羌徐太康王臨漳
戲詠玫瑰花

芍藥花嫌小荼蘼香較濃連宵枕函裏開得一枝紅

偶得五百字酬景方伯安枉贈之作

五年客京師五年客西秦十年亦何爲頗與載籍親昨來遊梁園編
校事亦殷雖依尙書居一面或數旬貪讀終卷書久立門外賓盤盤
齋西頭乃與公比鄰

君前官按察時
衙齋與節樓比

識面雖未嘗吟聲日相聞前奉

一卷詩未讀已束紳開帙贈友篇古意何温醇我雖未面公已晤公
心神豈惟識公賢公友亦絕倫方今富羣才作者日以新誇多而鬥
奇如鳥爭鳴春若論性情詩

當代無十人昨來喜雨篇憂國何諄諄民之饑渴懷乃若在一身

聖人垂衣裳周覽靡不臻惟茲大河南民俗庶可淳疇咨兩場區責

此司牧臣温温今尙書百族依其仁抑聞爲治方寬猛得並伸推誠
固宜先條教慮勿遵自非東吏嚴曷表于物勤此方當河衝水旱又
已頻調劑幸垂思蘇此十郡民明明哲人言芻蕘亦諮詢吾儒道無
方詎敢分域畛值昨憂旱災露坐每達晨雖無牧民責憫此俗痛呻
又聞垂空言不若實意存元公生中唐疲俗善撫巡春陵詩一章字
複語句陳不妄作一言言言盡真純重之如典謨敢並詞客論期公
亦如斯古治藉以振立言非徒然六籍乃本根公行擁麾幢我亦邦
國珍各望致遠謨貴在質有文廿年客諸侯利弊粗得分前蒙相公
知謂大學士
英文肅公謂可軼輩羣相公居東華于公世婚姻我行讀公詩宗
法倘可循公才及前修況乃性行真感激贈一篇交誼賴以敦行當
計吏偕千里馳短輪方其未屆塗先欲一掃門傾心于所知拂拭衣
上塵公其佇清聽含意庶畢申

戊申社日送友人至河北

去年社日風鼓浪渡河北今年風更峭掩卷送行客梁園作客無可
誇春半欲過無春花昨升射圃望原野青草不見餘黃沙狂來濁酒
誰能捨更逐兒童趨里社丈夫志業亦區區割肉聊同宰天下

杏花四絕同方五正澍作

倚牆臨水只疑仙豔絕東風二月天要與春人鬥標格有花枝處有
鞦韆

春陰薄薄霧濛濛魂在江南細雨中千朵冷光看不定辛夷花北柳
枝東

春當好處鎮無聊自向簾前理玉簫手把一樽歌一曲紅顏祝過百
花朝

十年騎馬曲江頭拂袖籠肩憶俊遊畢竟植根高處好占他天外小
紅樓

開封寒食懷里中勝遊並記壬寅癸卯看花韋曲之勝漫賦二十截

句

貫却黃壚酒滿卮破愁聊飲半春時東風吹得沙成海不見江南雨

一絲時旱甚

沙堤高比鐵浮屠不信經時草未蘇七百年來理春夢閒窗私展上

河圖

才人豔說李深之束髮能題七字詩一事至今忘未得賣花聲過晏

公祠

末句余童
年作也

枕溪樓閣水迢迢租舍南頭巷北條半樹桃花一雙燕與鄰家共十

年同住裏河橋

閒來時傍女牆行半里蘇蘇草欲平蝴蝶滿樓人不信日烘花氣上

春城

經旬曾未踏蒼苔杏樹花疎欲替梅紅到枕邊驚夢醒一枝捎破紙

窗開

溯流歸去路偏賒欲到溪南被柳遮時有鶉鴝啼一兩墨雲如夢罨
千家

辛夷含玉柳垂金襯得簾前一片陰渾愛曙光初破處遶闌來看百
花心

短短疎籬曲曲塘過橋十步破雲光春衫不上梨花影只覺月明衣
袖香

一拳奇石構幽居小極攤書向午餘何事鏡奩光不定紫藤花影罩
紅魚

醉醒渾未識天涯古寺南頭一徑斜似有塔鈴傳細語菜花黃徧那
人家

兩年頻讌曲江池紅杏尙書是本師知要傳公舊衣鉢碧紗籠徧紀
遊詩

樂遊西去幾長亭杏樹交紅柳接青却礙白雲無路上南山屏是百

花屏

豹林谷口亂山交，三兩幽禽挂樹梢。
與我一般無宿處，木瓜花覆舊時巢。

半日招提問路行，欲歸已有野僧迎。
一峯才轉一峯出，北斗向人衣上明。

皇子陂前一徑通，藍輿三宿水聲中。
小樓東面不曾掩，夜半月來花頂紅。

傷春筵上憶王郎，容我朝眠錦瑟傍。
榆筴盡飄荷樣小，更無錢與買年光。

折柳傾觴日數回，班騅欲去更徘徊。
送人一片南山月，穿到霸橋東岸來。

花時頻入少年場，兩兩遊蜂逐隊忙。
悟後始知春意淡，沿溪都種白丁香。

被塵封處客難行
破曉愁聽粥鼓鳴
輕燕不來人跡少
客窗誰與證清明

寄錢三惟喬鄞縣

昨聞急使到河干
珍重臨期語百端
念友情心成痼疾
著書蹤跡尙平安
閒中閱世誰先覺
夢裏聞君欲去官
繞宅太湖三萬頃
幾時同我把漁竿

張憶孃簪花圖

花紅無百日顏紅無百年
只有茲圖中花與人俱妍
當時一笑春風閣頭上好花
終不落可知花福亦修來
長得纖纖手香握卷中小立
亦百年不覺衣帶飄東邊
幽蘭無言露猶濕花意人
意交相憐百年花尙香
百年人不老題詩我憶卷
中人莫更錯呼張好好
題夷門錢別圖爲凌上舍廷堪送友

三千食客都無用
四十斤椎乃有靈
風黑滿天塵繞地
欲從何處送

秦青

雖云卿自用卿法坐覺人愁令我愁目送羊車出城去柳絲五月已驚秋

趙大懷玉寫經圖

小時一筆不得書吾母教以分行疎小時一字不能識吾母教之先點畫識從一字至九千寫自一筆幾連篇年華屈指心先悚書欲如山筆成冢人言學術有淵源我視庭闈若周孔自傷孤露東家子不謂君前亦如此卅年文譽冠九州可識從親授書始白雲溪頭橫舍東吾親若親昔過從互依膝下問奇字各舉傳記談如風檐前風樹聲無定不待孤兒讀書竟生年不造痛亦同六十二年月冬孟吾母及君母葉宜人壽皆六十貽親望子以令名我免爲惡慚先靈卽論至性三下世又並以十月題篇不敢寫今稱母但知兒小名耳

寒檠永慕圖

屬君賦長句題篇不敢寫今稱母但知兒小名耳

卷七

十一中華書局聚

七夕詞倣方五體

閉門三日雨無聊聞說秋霖漲絳霄若使天孫有餘巧擲梭應已化
成橋

汲船新到綠沈瓜早汲銅瓶薦井華佳節莫栽閒草木牽牛花映女
郎花

商量羽葆日相過肅肅長雲裊裊波莫喚填橋舊烏鵲好教精衛去
填河

紅闥小極戶常扃只看銀河眼轉青忙裏却添閒意緒拜完新月拜
雙星

題仕女屏風

尋幽徑有二更霧小病人如四月花胡蝶影多簾影少幾回隨夢入
西家

怪來書味上春容校得仙經意乍慵不信驗他雙指爪粉痕猶淺墨

香濃

三年渾住宋家東一語嬌羞尙未通他日曲江亭子上借他簪鬢一枝紅

徐孝廉蒿芙蓉湖上讀書圖

有峯三十六都接海天青爲要魚龍聽先繙嶽瀆經鏡收千樹綠鏗借一湖星莫厭春蔬淡時餐兩脚腥

嚴侍讀長明平生樂雨花岡二忠祠竹木之勝沒後適權厝於此其子爲圖乞詩因賦此篇

梅花如雪開朝暎昔時翩然來叩門山僧驚起款尊客石上煑茗春泉溫佛樓花謝剛前度遺魄偏來賞心處山僧行脚尙未歸返使先生作常住梅枝垂實葉暗廊琉璃一鐙綠到房闌干幾曲助風勢縹帳瑟瑟生新涼萬言結習難忘却真見唵聲出樓角可知此客不尋常三護鳴鑾四登嶽壯志方期獨擊鷹赴書已附西飛鶴枉憶春風

去住舟癸卯甲辰間與君先後回江南于路相左長懸夜雨東西閣謂同遊紫閣白閣君不見雨

花岡南坡草青前後車馬來無停先生高臥事亦得不見牆外勞勞

亭

黃通守易訪得漢武梁祠堂石刻聖賢畫象既爲亭覆之又繪訪碑

圖索詩

高平石刻皆雲烟千載復見嘉祥阡平原武安吾不識得姓要在西
京前大河南移川變陸削石棱棱數間屋不隨巨浪入滄溟中有聖
賢牢置足四百餘字漢八分句字樸棟如皇墳以之持較李剛刻四
角但少龍鱗文訪碑客至何瀟灑拓地爲碑營大廈道旁錯認魯東
家一車兩馬栖栖者

八月初九日將赴楚中童少詹鳳三邀同張學使燾崔編修景儀趙
舍人懷玉蔣上舍齊耀預至吹臺登高歸飲寓齋卽席賦別

人生擾擾東西走快意登臨亦何有梁王城外亂雲飛天預商量作

重九翰林仙人張別筵邀客先上層臺巔五車聯尾出東郭七騎矯

首來雲邊紅沉綠暗青林表人亦蹁躑若飛鳥中臺陡接天半風吹

斷語聲空際裊歸來酒腸誰最寬詩老昨幸留餘歡謂張學使一時忽得

兩短李崔趙何處可覓詩方干時約方五正樹不至冥濛樓閣鐘聲細清夜淹

留賞心地遊客鄒枚讓馬卿酒徒毛薛依無忘却憶三條樺燭人正時

局院青衫白襪雨如塵名經我愧身非佛作賦羣推腕有神少詹及舍人皆

以勝遊一夕聯吳會別後萍蹤復誰在明日朱仙鎮上眠先

商黃鶴樓頭醉時少詹亦將遊楚

中秋夕自尉氏至朱曲途中玩月作

四望各無際疑行萬里沙碧天微有影初日定輸華露采驚棲鵲雲

光發檻花此時心跡冷誰復夢思家

中秋夕三鼓作

林露下千點砌蟲鳴百端此時羅袖影一一上闌干佳節異鄉好清

輝徹夜看延回思往事坐久不知寒

自樊城渡漢遊峴山歸謁羊杜二公祠作

我從南陽來欲飲襄陽酒秋霖三日不暫停馬足泠泠挾波走還攜
梁園客遠上樊城望昨日秋風捲地來一條漢水浮天上襄陽城北
樓正開放艇若從天際回城樓高與柁樓對無數山綠衝帆來松楸
連綿十餘里客到寺門山忽起昔聞峴首今始登一石真堪入雲裏
可憐好景輸後來削壁點上千年苔紅闌干落一江水白日照舉堂
中杯當時幾掬西風淚更值山公百回醉寥落征南身後各何如眼
底杯常在習家羣從噪一時我知葛彊亦可兒滄桑陵谷幾回改何
處可覓山公池白雲茫茫一千頃曾照前賢角巾影羊公遊後渺無
人秋草荒寒沒人頂山前一亭昨復傾騎馬上與浮雲平難追國士
濡頭飲亦愧英雄髀肉生一碑橫眠一碑側石上摩挲感今昔百世
來分風日佳一編欲正春秋癖

時著左傳註

歸路慵騰醉不辭乍醒還謁

二公祠可知此客今無輩放許高吟峴首詩

隆中諸葛忠武祠

遂有經時臥知逢漢德終地當天險山即宛中隆蜀國望難極沔江流不窮蒼茫墮清淚知不為羊公

九日雨中飲楊進士倫江漢書院齋舍即席賦贈

堂中書百堆門外雨三尺堂裏讀書人修髯新若戟前時別君處七

客指馬鞭歲月苦未多兩復地下眠謂莊舍人選宸楊司務仁基君思武昌魚我

饌終南鹿食鹿苦鹿肥還尋渭濱竹首春寄君札八月無報書聞言

楚水高魚蝦自登廚我乘東南風鼓此接天浪帆落即訪君疑君坐

天上讀君五年作飲我九日觴腹笥既已富修髯有時張轉思三十

年交君及君弟君弟亦服官時君弟官崔峯州判官適至自知吾老矣無言契闊

久且喜會面初兩心苟相親天地不得疎

道中作

亂峯高映斜陽赤谷裏人行已深黑溪南新月透山來千朵白雲遮
不得東西秋水隔一村跌涉尚喜山泉温山村樹濕昨宵雨石屋冷
泠出蠻語

黃鶴樓

黃鶴磯前黃鶴樓到來一笛欲迎秋神仙蹤跡成長往吳楚江山此
上流帆影靜排千雉堞檐形飛控兩雄州支頤我正東南望却有雲
生碧海頭

仙棗亭

纔泊金牛港口沙上山亭復做浮槎真疑楚國萍如斗誰識仙人棗
比瓜白鷺兩餘飛急浪紅闌天半放秋花談深我亦饒鄉思時值里中舊友
百椀頻澆陽羨茶

月夜再登黃鶴樓憶尚書師荊州

上城已有角聲催曛黑窗櫺信手開十月魚龍先入定三更烏鵲自

飛來巴人路向雲邊出楚國天從溢口回誰敞庾公樓畔月不勝清
興待銜盃

種菊

古人愛深黃今人愛淺碧豈惟人事殊花亦悵今昔今晨買花至隙
地種盈尺百種盡弃之聊存花正色清泉日疏灌間以數奇石倘訪
泉明居沿流卽彭澤

食蟹

江客嗜飲江烹鮮及羨藕無緣傍江住常復面山走茲來愜心素百
步距江口江水照讀書江船送春酒武昌魚既好鄂渚柑常有右手
留校書持螯還左手

黃鶴樓送史上舍善長至南昌並寄王方伯相

蜻蛉舟黃犢車爾不如仙人陸行有黃鶴水騎赤鯉魚豫章城武昌
郭仙人不如爾朝登武昌之飛樓夜宿豫章之傑閣一樓既參雲一

閣復接天洲前鸚鵡喚客不能住閣上蛺蝶飛舞開賓筵司勳詩筆
王郎文我優爲之何論君成名當世偶然爾拍手笑殺神仙羣神仙
舊侶吾能識方平牧羊今作伯有時耳傾彭蠡百斛濤手拗匡山幾
方石明月湖光一碧百花洲香四塞興酣容我倒玉山不然爛醉從
君校金石

方伯近著
金石集成

送蔣孝廉知讓歸江西

屋角新月明送君在今夕君言歸故里營冢有期日一奴一馬縛兩
羸千里冰雪高嵯峨黃塵飛盡綠波出却上黃鶴同高歌

時楊進士
倫主講武

昌君言
當訪之君家兄弟今無輩百歲相知亦何愧知君念我當有時啓戶
來看九江水

爲張孝廉鶴題烏巢風雪卷子

枯楊聲已悲夜烏啼不歇男兒處窮海十日九風雪朝烏催讀書夜
烏催閉門枯楊作薪爨不温老屋還倚枯楊根去日長來日短夜烏

窺人顏色慘讀書成名何足言不若識字依親前君不見兒行不離
路親鳥飛不離樹鳥巢呀呀能反哺失母孤兒哭何處欲望重泉作歸

卷施閣詩卷第七

卷施閣詩卷第八

陽湖洪亮吉著

靈巖天竺集 丙午至己酉

跋英文肅相國所藏錢文敏詠物詩卷子後

故紙方三丈尙書五字詩九原悲宿草七客有餘思 是日集余風雪授經堂者七人

同觀粉墨傷心色 詩以雲母箋寫就 煙雲過眼時猶慚門下士亦辱相公知

余爲文敏門下門生夢 堂相公見待亦多異數

入值同趨

朵殿偏匆匆落墨寫唼牋曾攜暖翠浮嵐上 夢堂相公藏書畫閣名暖翠浮嵐 忽寄

閒坊冷巷邊 文敏幼弟維喬報最入都得之坊市上時相國下世甫數月 小友忘年情愷惻兩家

多故淚纏綿相公詩格尙書筆當代何嘗有後賢

丙午二月十日偕錢三維喬楊大夢符等元墓探梅作

停帆及山椒雨點忽破夢東風來林間春衣香氣重尋山三折至一

亭樹梢微紅雨脚青山光乍零亂薄暝花紅出天半空林黃葉
時一零木葉盡脫花含馨全湖香氣收欲盡時有孤客揚幽舸白雲
不在天碧霧欲沉水一片溟濛盪成海危瞻花路復百盤瘦影先憐
幾人在時錢君偕崔夫人等先在花光如月澹不分松翠入戶團幽芬繞花百匝
不知厭可惜下有春人墳時尋明張靈墓不獲持千觴揮百尊不飲已慚花下
人來聞曉磬聲歸及晚鐘動春泥深深鞋沒縫十里回途花作街

贈崔三景侃二首兼寄哲兄景儀都下景儼劍門

客兒微子本齊肩未向衙齋識阿連今日西堂賦春草懷人蜀道上
青天難兄執筆趨蓬觀小弟裁詩壓綺筵三處離愁一杯酒夜寒聊
與對牀眠

曾訪疎梅徑石橋錢郎度曲蔣生簫謂錢大令暨蔣上舍陳尊閒愁歲月過二十

如夢谿山似六朝五夜衾稠交燭淚一旬衣袂未香銷穠春正好須
歸去且莫風前折柳條

由淨慈寺至龍井道中作

離湖始入山一徑青裊裊土風殊清淳花比桑麻少人家嵐氣重屋
角出青草馬上人影高窺林撫巢鳥空外山雨來方嫌出門早

龍井小憩

昨夜月沉前灣朝來白雲不閉關款關僧少復誰伴白鷺引客來前
山山巔一亭高百尺峯後峯前勢相及行人天外忽舉頭一谷石奇
都欲立

冒雨尋三生石

一寺兩松梢零天半樓閣開青冥三生寺邊石如屋我坐剝蘚看題
名山空氣候殊難省冰柱檐前燕巢冷春風開徧半山花尚有半山
紅樹影

薄莫至湖上小飲

行人乍離山山色已如夢回聽南屏鐘薄暝數聲送衣單思中酒春

醵喜盈甕漁人蓄魚處引水漸成衝雙鯉欲飛時全湖綠俱動

錢唐舟次作

芍藥開雙枕芙蓉刺裏衣不知花是繡蝴蝶上牀飛

錢唐歸舟寄錢三維喬一首

昨來揖客津亭東布帆如雲已挂風春風亭前一杯酒送客多于道

旁柳我行小別君遠官十艇接尾衝波寒虎溪橋頭住經日塔影亭

亭對波出全湖雨勢閣上來放艇忽欲尋疎梅梅枝高寒雨聲急倒

著羊裘雨中立攜花滿船夜不眠花底裙屐皆神仙時崔夫人亦偕往我船

載酒獨欲前更有一艇鳴舻絃舻初斷笛聲起白鷺繞波飛不已

哦詩聲細出舵樓更放健筆圖清遊時方作聯舟雅集圖快哉風帆不獲收一

日一夕來湖頭湖雲正好湖月輝惜爾遠宦余仍歸五年回首別孤

嶼夢度江波逐君去君行送我一惘然何日更放梅花船君不見故

人十輩多爲吏誰爲梅花決歸計

送楊大夢符至東平書院

巷南春泥深一尺知爾欲行行不得杏花枝頭春日晴爾今別我有

遠行欲行不行奈何許隔渡先聞喚船語莊生莊四述祖玉立北岸偏瘦

影已過溪橋前趙家兄弟巷東走拂盡垂垂道旁柳沿溪送者三四

人日日痛飲酣青春青春回首六十日與爾同舟及旬月忽然疑我

欲作仙著脚萬樹梅花邊忽然疑我欲出世百尺厓邊悟無始看花

十回月五回更向西浙看山來山花流紅照杯酒碧月蒼茫墮湖口

茲行樂事無不有十舫峨峨集良友樂亦既已極別亦不必嗟劉安

鷄犬亦同徙羨爾一舫攜全家此時只憶城東門桃枝李枝將放春

莊家笋足酒亦温可惜眼底皆離人時蔣大齊耀將赴選盛二惇大入都補官趙大懷玉亦有浙西

之行作詩寄癯崔兼與瘦錢說年荒花好難久居我亦清明挂帆別

花朝日訪袁大令枚江寧卽出隨園雅集圖索題因賦以志別

生年雖後可不慚圖中五君識者三吳門尚書年近百艤舟亭邊亦

相值沈文憲德潛我讀尚書篇已識袁尹賢白門深秋一相訪苦說詩人

惟瘦蔣蔣心餘先生騷壇落落此數翁若論文筆尤推公圖中少年昔驚

坐陳州此日鬚眉已如我公前罷吏學閉關却有謝傳遺東山後先

居山兩安石公不爭墩各自敵翛然松竹倚北原因憶主者各隨園

園本隋織造所構因仍其名卅餘年來執牛耳不到茲園名不起公自言名士未

偶然落筆貌昔遊歲則乙酉時清秋園林疎疎風屑屑已覺尚書履

聲出彈琴既無絃垂釣亦直鉤少年落紙不肯休我見識是非常流

此詩此畫誰能逮出筆都憐才蓋代南北詩人十數公卷中如莊滋

文端三相公暨錢文端文敏沈文憲彭芝庭諸尚書均已下世僅餘一老稱前輩山中訪客當花朝

擲我一卷如牛腰止留紙尾盈一尺寒夜乞我來揮毫是夕大令留宿隨園小眠

齋小眠齋外花光紫窗前藤花甚開讀畫讀詩愁不止尚餘一客味生平掩

卷來尋尹公子圖中唯尹公子蘭未及謀面

道中遣懷十首

月館風廊望若仙
眼花濃笑髮齊肩
讀書燈下匆匆見
此事分明十五年

欲歸清漏已迢迢
忽覺沿溪笑語飄
風裏紙燈拈不定
暗扶絲柳過紅橋

長廊轉盡款幽房
鐙穗微紅月乍黃
天半忽聞金釧響
最高樓閣整衣裳

私理銀瓶汲井華
個儂薄醉未回家
鸚哥欲睡人還立
團扇親拈自煮茶

看星歸去已匆匆
早闔園扉怨小紅
贏得夜深談往事
一雙人立雨絲中

春波東去逕西斜
紅杏枝低戶半遮
垂淚別他雙燕子
烏衣巷口欲移家

酒溫香膩乍魂消
月采冥濛隔絳綃
早有玉人傳細語
百花生日是

今朝

團團月扇放簾低對面梳頭背面啼故倩旁人說春夢自來庭北剪棠梨

夕望征帆已百回模糊明月上梯來梨花一樹宵無影却傍人人素袂開

往事怔忡一夢中欲搥清淚寄東風可堪行到無人處一樹桃花著意紅

秦二世泰山石刻止存二十九字在泰山碧霞元君宮乾隆戊午年復燬于火搨本甚少今夏黃州倅易搨得一本寄孫大因爲賦之昔者東海神照見泰山火惜哉篆法存竟值炙燔禍神人嗜古理則同急雨已下元君宮碑雖不存紙本出光焰尙燭秦封中我聞漢家重六經丞相半武夫秦人棄詩書當國悉大儒咸陽門邊呂覽收泰山碑旁斯篆留一摩巨石衝天上一抱遺經入黃壤爲陵爲谷倘有

年碑石沒地下遺經出人間經學既大昌籀法亦可窺人摩一本日
觀寫豈數丞相東封碑斯言雖狂由激發且寶斷碑臨萬札君不見
欲將一字比一星二十八宿應添伐

童上舍鈺所藏晉太康五年買地券歌

大男楊紹買地券太康五年歲在乙文云九月廿九日黃滕闕澤北
瞰湖古名今地勘不符今爲山陰十七都明嘉靖中山陰十乾坤六

合甫歸一日月四時須作質瓦尾更言如令律可憐青蓋飛前年四

十三郡登降牋當時曾不費一錢太平土價高于玉買土爲墳傍山

麓四百萬錢稱賤鬻土公當日疑有私賣地不與天公知故列證佐

詳年時前孫吳與後司馬劫後山川餘片瓦光欲流虹手難把童君

好古無一田一瓦乃直二百千抱瓦日向高齋眠瓦文稜稜六十字

不及質君真恨事采入晉家疆域志時著東晉疆域志適成荆中黃滕闕澤諸地名悉采入山陰縣

下

青門送別圖為史上舍善長賦即送歸吳江

渭城西去青門東古今送客愁不同咸陽原邊馬行少只覺客從東
 去好去年別青門今年客梁園梁園為客忽不樂放眼歷歷思秦川
 幾年君向何方住君久客甘肅却望秦川作歸路貪看削雪萬重山行到
 斜陽最西處東西歷盡詩一囊已抵陸賈千金裝吳江楓落句雖好
 何似變體吟伊涼讀君詩完飲君酒七尺憐君好身手塵衣浣向海
 東頭飽看日上滄溟流

送邵秘校晉涵入都補官

君行不得行一尺大梁雨流潦衝夷門街泥積如許大梁雨足欣有
 秋君雖不行我夷猶廿年三度與君別被酒歷歷追前遊逢君乃研
 經逢君乃注史當時苦說兩少年只惜黃郎已前死仲則騎龍弄鳳
 戲里閭斬蛟射虎節不拘性情至此忽一束細校科斗牋蟲魚讀書
 識字居然異長句猶能矯奇氣大龍山下別君時千六百言君倘記

辛卯壬辰與君同客安徽學使幕後于壬辰三月上巳筵江水一樓懷寧城下相別各爲詩八百字以贈焉

詩一篇我敬白袷方詠月君著宮錦行朝天長安米貴居偏易蓬觀

爲君著書地宜南坊外三斗塵一客入門驚故人故人久別儀容野

日倚陳編與傾寫已看貴紙寫南都君時著宋南都事略及爾雅正義尙少築臺名

爾雅十年哀樂事亦同往往相左紅塵中丙申夏君奉諱南歸訪余于里門不值是年冬余亦

遭太孺人憂及甲辰春入都訪君又于三日前奉太公諱南下不及見矣梁園握手亦意外濁浪飽吸餐

炎風河流拍枕朝難醒官燭燒殘夜忘永蠹魚窺客客不知雙鬢都

垂二毛影盤盤萬卷縱堆窗只覺逢君氣早降禮堂若寫羣經定君

署南江我北江君據漢書地理志許君說文定分江水從餘姚入海因自號南江余亦據地理志毗陵北江在北東入海

因顏其草堂曰西蠹北江云

黃州倅易得漢石經尙書論語拓本殘字共一百二十七因自繪象

于後索賦一篇

陳留中郎真大儒六經能以一手書一手書後萬手模太學門外車

填衢闢堂堂皇皇三百尺日月入之光欲奪當時共喜聖籍尊可惜偏
遭漢家末碑成不遣麤彝馱預恐識字驕龜鼉惟應儒者得觀覽證

以師說無差譌六經之文萬萬古水濡火滅均可補周篇秦已值祖

龍漢刻晉還逢石虎水經注石虎載經于陝津沉沒大河左右地可觀掘土尺許皆

琅玕魏安僖冢逸書出唐御史府遺碑傳宋初開地唐御史府得石經十餘石此經此

本誰所拓疑古疑今日詳度八分縱異石室體一字已勝稽山閣論語

碑較蓬萊閣刻本由誨下多一女字黃君是年三十四尺壁換來殊不易賞音不啻爨

下材寶墨尤逾枕中秘吾儒策勳亦可哈詎有麟閣兼雲臺研經半

世貌逾古畫像且復登蓬萊虛堂六月消暑色且借此碑讎隸釋中

郎中郎不能值我見虎賁三歎息

送沈秀才思訖回浙中就試

三日檐漏聲正慮大河決沈郎馳征車乘此疎雨歇一奴鬚蒼然一

馬色驪栗亦有酒一杯迎門且言別歸裝不憂儉萬卷深壓轍八月

天地潮排空試詞筆吾鄉窮令尹錢大令維喬望我一書切軍門亦吾友

陳提督大用天上吹簫策君行倘相值定復詢消息為言頗善飯暇即耽

著述去去弗復遲沿塗有新月

吳大令錫緯以二月抵大梁即奉檄勘賑西平遭疾遽卒亮吉等斂

金相助至九月旅櫬僅乃得歸率賦此首哭之

夙交君叔暨賢昆子與君季父祖健及仲兄繼緒素相契相識方欣萃一門濟水南來

曾鬥酒辛丑夏予下第偕崔吉士景儀赴陝中時君在臨清權署留飲一日大河東去與招魂夢為蝴

蝶同飄忽昨夢君及莊同年選宸莊為君表第時下世已一年矣生與蜉蝣競日昏更向邗溝

尋舊侶十人今僅兩人存君所居枕邗溝巷東西最長予童時舊相識如錢伯謹仲默升之守之唐介石在茲

兄弟孫思雍布衣潘章叔上舍二十年來先後下世今存者惟君叔暨錢樹參明府二人耳

送汪秀才渠堂歸錢唐

琴堂曉日列長筵執卷呼名始得前君尊人邦憲曾令陽湖予始應童子試即識君我傍土

牛依砌下君騎竹馬出簾邊論文尚記三千士時二縣應童子試者至三千人此事

多應二十年今日送君惆悵甚使君墳草已芊芊

喜楊大芳燦至大梁即送入都

十年復一面萬里各在胸重來酒壚邊恨已無黃公謂仲我方強仕

歷九州尚恨未極天西頭君才早宦原非過僅得一城如斗大花門

勢面昨負恩城大如斗真思吞升平本乏邊塞績小醜乃建君奇勳

手揮稜稜萬言檄左手更兼能殺賊城頭一矢落一人餘者不敢來

爭門飄然望君一千里時子客西安日讀軍書為君喜丈夫事業豈偶然

頗取僅以文章傳等身著述亦何有我抱壯心看北斗涼秋九月集

大梁左蔣並在寧辭狂時左孝廉輔蔣上舍青曜適皆以事至此時頗復憶孫楚謂淵

爛醉尚滯華陽岡眠遲消盡雙紅燭別久話多還抵足尚書愛客知

客狂夜勅齋廚餉醞醪一旬送爾城南臺倘得殊擢君還來君不見

吾徒會合真無幾更隔十年愁老矣

乞梅詩投左二

故人齋畔樹植我小池東他日花開處如君笑口紅
疏池貯科斗搆石帶莓苔預恐秋窗寂先移春樹來

卷施閣落成偶賦四首

我非一世人世味本無泊中年感孤露顧影失棲托故巢有時歸戚
戚寡歡樂妻孥中道合久對面生怍衣食粗已完聊爲事疏鑿閒身
置天地非可自菲薄臺佟忘世事幽賞寄巖壑藉此山一房寥寥通
五嶽

晨涼始讀書午倦亦展衾昔夢旣爲昔今夢成其今夢醒理未殊安
得分戚歆昨者疏一池貯水不欲深安知旬日間不復成雨霖閒門
晝常關石古苔氣陰積卷貯石旁一詠兼一吟掩卷忽憮然此意難
復尋迷陽花斷腸卷施草傷心傷心以名閣淚下霑衣襟

東鄰啼鶉鴟西牖蟬噪柳忘機一延佇物態欣有偶茲晨風日好爲
具約吾友豐歲慶有期先秋富羨藕雛童識南北款戶速誰某齊年

居七八大者顏未叟各各徵所聞居然足談藪傾觴及終日僅足盈一斗中坐或慨然年前失黃耆

昔者慕著書鉛槧二十年傳世難預期庶足慰目前前年少尹亡黃仲

則檢討疾亦綿孔橋惜哉同心人生命均不延初日照屋閨神澹不

復眠偃仰萬卷中有若田大田注史忘歲時炎暑忽已遷一雨斷往來展卷晤昔賢餘事非所營庶以全性天

七夕獨遊放生禪院兼至楊氏宅訪友有懷進士倫武昌

一院千聲出風蒲葉葉秋怪雲都上殿野水忽平樓石徑歲逾圯禪堂昔未遊夕陽真有意穿樹到東頭

九株松檜綠遙識草玄亭鄂渚客偏久山房昨已扃款門逢地主佳節指天星正好涼汀坐相攜采素馨

初八夜蔣太守熊昌招同人小集卽席賦贈

久別真憐廢過從舅家庭樹尙葱蘢所居本余從舅氏故宅樽前秋思催春燕

天外晴雲挂雨龍安志約僮刪徑草閒心邀客鬥詞鋒狂唵痛飲都
成慣不管前溪渡口鐘

冒雨

行人未歸處雨點黑如鴉細路獨三里秋原餘幾家魚梁入波冷荷
徑送香斜爲有年時舊留賓過水涯

郊宿

破牆南望處十里月空明秋露洗逾綠殘鐘敲更清樹疎涼意定塔
古夜光生不覺心神寂寥寥夢未成

夜起

水南一燈明復昏欲歸不歸夜向晨秋花如拳挽行客月露似眼迷
歸人流螢出門光乍小徑密人行復披草却到橋西憩石欄寒鴉噪
客來何早

早行

珍做宋版印
曙鴉聲一片秋露洗高原暗影驚谿樹迷塗出毀垣磬疎分寺塋波
響涉泉源略約危如此松梢手欲援

紅梅閣小憩

野人愛郊野近郭行半里紅樓出林梢星壇入雲裏因緣開北牖半
日坐難起秋圃黃金花空潭赤文鯉

東郊憩劉氏花園

出郭閒行閱歲華風光偏足野人家涼生碧玉參天樹秋到黃金布
地花小閣四圍巢燕棟夕陽三面響魚叉林園不欲窮幽處留與閒
時共鬥茶

飲酒十首

人生天地間各各私所有未知室中物屬客百年否百歲非可期得
半亦云久萬事取目前沉沉飲吾酒

憶從墮地來不識天上事同儕應念我久別及一世飲酒或夢之時

時致沉醉寄語區中人無爲擾余睡

嘗嫌生世遲千載隔鄒魯不知更千載我又成太古詩
代相視我卽鼻祖所以勤著書空言不無補

作客二十年衣食知其難卑身與周旋不敢忤世顏
人事旣以希飲酒輒閉關頗哂一世苦說不得閒

性癖喜獨尋不避邱與壟高原何蕭蕭愛此木已拱
要知百年後行者皆接踵春到骨亦知柯條節間聳

涼蟬飲清霄下者口亦啄物性饑渴同飲酒人所獨
神明頓通徹味乃勝食肉所幸吾已多東鄰酒家屋

黃生苦不達飲酒或酒悲孫郎庶通方量復與興違
吾皆與之交泥飲輒不歸一死一別離行當徹尊罍

秋聲來無時當戶鳴蟋蟀夜短心甚長沉憂逮朝日
卑身處天地非敢計家室百念集一尊傾觴亦將噎

客有一寸心抱此亦云久妻孥不能知庶可喻良友悠悠二三子悼
歎莫吾偶一世乏賞音吾將寄身後

前日無好懷昨又寡勝侶今晨心賞至檐外忽風雨蠟屐雖已攜塗
泥積如許感此復閉門終朝杯獨舉

將至烏鎮率成二首呈崔通守龍見

我騎竹馬甫成童綠野堂開識寓公壬午歲于錢文敏公第中識君時甫成進士裁句早

甘牀上下飲泉今徧瀾西東君歷署金華處州及烏鎮同知雲霄事業看兒輩謂長君編

修景儀夫婦神仙豔里中若說通家較清切伯孫榻畔拜扶風

蹤跡愁邊與病邊放懷應不受人憐中郎才筆推前輩太傅門牆記

往年謂錢文敏威鳳羽儀終就日成龍腹尾盡升天淮南賓客如相問只

我遲回懶作仙

四鼓渡鶯脰湖

三更涼月侵放棹復幽尋客念此時寂鐘聲昨夜沉露翻千葉白雲

定半湖陰只有閒鷗鷺能知天地心

夜話贈蔣上舍陳尊二首

秋樹齋頭夜氣深故人久別話升沉黃金市上空求骨白雪尊前孰

賞音循吏幸依崔不意

君客崔通守署中最久

專家應學董無心時訊董孝廉思嗣消息甚

至年來絕業誰能識撰到清風與竹林

二十年前共閉關白雲谿上著書閒曾拋屋畔撈鰕渚

君有別業在鶴蕩近屬人

矣却買州南射虎山

君尊人近買宜興縣南山數十頃云十年後當獲其利

別日壯懷應少減

故家生計未全慳何時得遂幽棲志擬笛風前與往還

新正二日太倉毛州倅大瀛招同鉛山張上舍舟歛方上舍正澍無

錫鄒公子恩三山徑探梅卽席賦贈六首

昨來世事繁今晨賞心果寧惟市塵絕十里斷烟火行盡落葉聲寥

寥花數朵

衡門當道左客至主人辭園林非一所樓閣掩經時開傍宜春帖離

離紅亞枝

合牖敞風櫺離堂開雨宴陰晴花氣殊深淺雲容變猶斂向南枝將
無待春燕

疎香不到處山水足清華曲澗流時斷幽巖路忽又閒心聊點筆元
日詠梅花

雙筵旣藏鉤獨客時唵句淺醉已學狂欲歸猶未許且上百尺樓簾
疎試春雨

居然人慕藺毛君字又藺故云亦有字同楊方布霧方誰學談天口乍張無

爲勤遠送揖別此花旁

初二夕宿漢口聞爆竹聲不絕

漢水入江處東西一道斜五更喧爆竹十里散飛花已破早梅萼還
驚徹曙鴉聊應當鄉語淺夢乍回家

確山贈金同年朱楣

故人爲此縣幾載有賢稱隱几書三尺當門嶺數層
雨肥山郭蘚風瘦驛樓燈馬亦諳清况衝寒只飲冰

元夕宿尉氏贈張大令大鼎并寄徐州倅書受

去歲中秋永

去歲中秋日往武昌道過此留飲

今年元夕寒兩回明月好都向此城

看邑宰幸同譜盤餐聯素歡遙憐徐騎省雲外倚闌干

朱仙鎮元夕

鄭塞逢人日朱仙值上元殘燈依半壁春夢入中原
月直危樓影天連野燒痕明朝騎馬去又過古夷門

洪兒歌爲徐同年書受賦

尙之三十後生子乞余命名余舉前人之例名以余姓而以余名
字之曰孟吉則因其庶長也並作是詩

昨來欲訪夷門雪獻歲發春才十日故人舉子乞我名我名故人子
不輕我年始十三六經都過日書堂學咏新月詩得句先令輩流服

爾來卅載饒憂患文筆天人倘堪贊我老雖慚晉始興兒行何減吳
元歎字之以吉名則洪富貴或過我文章止期同白雲谿北餘環堵
我有三兒健如虎架上盤盤萬卷書他時一半應分汝

董生詩贈董上舍達章

董生賦吳山指上立采虹董生賦南海舌本翻龍宮我知董生由趙

左趙大懷玉
左二輔不識董生才過我我詩往復頗不窮不及董生句更工

我文亦饒氣不及董生律尤細董生知我我不知直待頌徧千篇詩

袁君愛巧大令
枚徐愛真徐大
書受二者生筆皆能臻不然何以天風海濤

相間鳴亦復雜出紫燕百舌黃鸝聲董生三十無世名我吟一篇見
者驚還生詩編生自省我在何能壓公等

闡官詩

徐上舍均爲言乾隆壬辰年其尊人某官邢臺令沒于官喪歸至
臨清大風覆舟一妹二奴盡斃惟均子甫四歲憑棺蓋得免時奉

天何土錫爲閹官爲出錢募役得曳柩出水四人者皆爲藁葬又
賃屋居生者數月均甫自邢臺至臨清得奉喪歸暇日爲余述其
詳余感何君之義爲賦此篇

臨清閹置官閹官閉閹方一日忽見天上來浮棺浮棺誰舊令尹
急溜失風船沒板一女數奴魂不返漆棺浮處沉四屍棺頂乃復憑
嬰兒漕船峨峨下水來大聲呼閹閹不開閹不開衆皆詈閹官倉皇
掉其臂三百閹夫聲若沸曳棺出水兒亦蘇魚腹奪出雙亡奴漕船
不前漕卒怒拍手大言官得賂官寧受取得賂名爲德不卒非人情
奴行烘衣兒進粥更爲羣棺賃雙屋周巡一日至數回越六十日喪
方歸君不見何閹官救人出死力送喪淚尙垂棺側竟與棺中不相

識

濟源謁濟瀆廟作並寄錢州倅站西安

我昔尋淮源騎馬至大復濟源今始訪尙未及王屋馬頭星落日未

光天半忽然落太行山形西上水東下中有百里雲之鄉雲鄉萬畝收常最水鳥鷺絲時作對開門飲水性不浮頭上白雲還可戴尋源

入廟得數潭酌以木杓殊清甘坐思地脈出靈異更有一源穿寺南

延慶寺西南有藻萍靜覺微風起那識泉流及千里不是天青落眼

前都疑赤日行潭底殿頭斜交松柏風碑頂錯落填青紅九州三瀆

得配食北海一神成寓公廟後祀北海神又有三瀆殿水光沉沉走靈氣飲水況

兼知水味點波縱乏魚眼紅入饌復添萍葉細土人以萍葉作羹雛童道我

行不休出廟遠看珍珠流土人指點復非一我臥欲向山南遊斜行

卅里無平地石觸馬蹄如斧利車箱側坐作一篇聊當西尋濟源記

我有故人官故京萬言能辨濟為滎州倅以爾雅濟為滎為滎字之誤置論甚辨何時並

馬入河澗應訝蔡河原號楚

延慶寺

向西行一里側耳水潺湲古寺埋荒草春風被北原上樓迎雁過遠

樹避禽喧欲抑飛揚性時時酌水源

盤谷寺

日斜來谷口新月正東升石壁餘千仞空山祇一僧品泉殘雪淨當
竈白雲蒸照我歸途好寥寥塔上燈

盤谷寺東山墅題壁

我來百級盤空砌一樹臘花香蓋地

寺中臘梅一株花朵積地寸許香尚郁烈

出門正值

過嶺風半里疎疎挹香氣此山泉水不出山曲折偶落幽人關泉流
落處閣飛起更向天半支紅闌閒心款戶還相揖一馬一奴催去急
臨行偶展几上書窗外白雲如鶴立

盤谷寺道中

盤谷路屈盤怪石都欲齧馬行既傷蹄騎馬復傷膝馬鞭苦不前奴
亦涕垂尺當其勢倉皇天頂作深黑天黑未黑幸有星松櫟百樹流
空青入山行遲出山急馬上別山聊與揖

宜溝行

宜溝驛中逢節使三日馬蹄聲不止衝途驛馬苦不多役盡民馬兼
民騾民騎不給官家食更要一騎增一卒馬行三日力不支馬病乃
把民夫笞長鬚壓後尤無忌急選官騾訪官伎民田要兩官要晴一
日正好兼程行車前輿夫私歎息曾與此官居間壁官前應試苦力
疲百錢得驢詫若飛君不見人生貴賤難如一不是蹇驢偏有力
夜過漳水橋

十里平沙兩戍樓薄寒衣上點春愁行人莫問銅臺事漳水如今入
海流

自錢唐放舟至上虞卽寄唐大令仁植嵎縣

我拋西子湖來訪山陰月山陰道上夜不眠明月都疑古時雪古人
何太閒今人何太忙四明山色笑人久狂客一去誰能狂山陰舊友
無人到還訪山陰昔時廟巢梁秋燕忽翻飛螢火遙遙出門照山前

月綠山背紅十里燈火連青松神簫法鼓聽不足水面黑已搖靈風
北山雲暗誰能見星點如萍落波面枕中秋夢爾許長船上月痕移
一綫我思訪友至剡溪故人手版歸無期曹娥江水秋轉綠話舊還
來此江曲天台山連天姥青舊遊十載難重經偶然雲朵錯上江訝
落十二芙蓉屏道旁峨峨孝女碑當日偏遣兒童爲閒繙榻本坐船
屋落落可笑時無才自非賀季真誰識李太白我羞黃絹詞祇憶錦
袍客詩成絲雨忽下汀屈指明日秋當晴會須散髮飲官酒百尺樓
上眠秋聲

湖上看雨

雨聲不著地惟走松柏梢山風颯然來時時撼鴉巢歸鴉點黑雨點
青星出復沒天冥冥樓高百尺陰晴變山外月明山裏電

湖上坐月

闌干旣戀月月亦戀闌干十二回廊內無人徹夜看青天沉沉黑雲

破時見東山鬼燐火星沉月落雨一天闢牖更枕荷香眠

湖上夜起

背山十里行何遲沿湖草香人不知草根螢火草頭露照客歸夢三更時紅疎綠暗誰家宅十二曲欄眠獨客開門無意望雲山秋水連天月華直

韜光精舍

山頭戴屋屋戴山山上又復開禪關斜行百步路深阻飛鳥不到人應還竹梢垂垂柏陰直一徑夕陽紅欲沒雲深草暗不見人蝴蝶花開四山碧

山陰舟中

四山圍一澗流水不能東青草添波綠高雲映樹紅挂帆零竹雨啓帳引松風已覺衾裯薄寥寥秋氣通

夜坐

三更人意定風竹自敲琴樹樹月華直峯峯秋氣深海雲當戶落齋
磬隔烟沉莫飲寒潭水空明此夜心

中秋詞

樓上月疑尋人穿戶南北還當門牆頭花疑伴客覆屋高低復窺隙
秋棠軒北待月華出戶小語聞呼茶尊絲如指藕如臂齒冷怯進西
園瓜池臺左側闌干右隔巷萬燈輝若晝琅玕鎖徑不一開坐久竹
風涼逼袖三更月暗絲雨飄約伴溪北行三橋走橋人多不相省獨
向橋心鑒春影

錢三維喬以桃花卷子屬題時錢新室將落成因作長句貽之

春風百萬花枝旁桃花李花能不香桃花紅紅李花白誰比春風好
顏色昔人飯桃三十年顏色姣好都疑仙人生駐景亦虛語聊取玉
貌臨風前披圖一人美無度綠鬢猶留遂初賦東邗溪北斗城南欲
種桃花閉門住一株花開千萬株紅蔽天卷圖忽忽念疇昔此景只

有南山邊牛頭寺古慈恩側雲欲不紅何可得君今臨水築新居縱
不栽多亦當百春風一吹香半空隱几如坐南山中半城鶯燕在何
處聞氣只掠花西東初陽入樹光凌亂一日風光百回換尋常客至
門不開祇許鄰童上牆看我家亦傍溪水隈桃無一株愁舉杯豈徒
鶯燕不相訪蝴蝶絕少窗間來與君街東西屈指月三五攜樽來遊
莫相阻我今題作桃花塢

楊秀才嵎谷漁樵問答卷子

聖不自聖何其謙執射執御無能兼儒羞爲儒亦何意欲漁欲樵誰
者是方其學爲樵不識世有淵方其學爲漁不識世有山用心可一
不可二君意胡乃雙相關我知終日樵薪復不盈束何以贈君爲君
歌伐木終日漁魚復不上竿何以贈君爲君詠忘筌吾儒之道無不
該況乃二者當優爲樵夫笑土匪無謂漁父鼓柁何悠哉君家家法
爲儒好天祿可讎玄可草堯夫經世吾懶觀復恐誤爾儒爲禪

有入都者偶占五篇寄友

孫比部星衍

自君居京華令我懶作詩作詩與誰觀誰爲定妍媸一篇偶賞心世論不免嗤一篇牽率成俗賞反在斯我雖不敢言得失我自知唯我與子心膠漆難喻之我工子開顏我拙子不怡非惟字句間兼爲審篇題前寄袁尹章枚昨答汪叟詞蒼霖上皆有墨瀋由君指其疵或時作一篇我心如亂絲置君于我旁素者卽以治別君居三年作詩少千首以此厚怨君君能識之否

邵校理晉涵

自君居京華令我懶著書一義偶有疑搜篋復發廚不然在君旁理蘊已畢杼問一必答三背誦若貫珠君疏爾雅篇訂正五大儒使我心上疑一日頓掃除君師錢少詹大昕精識世所無吳門及錢唐復

有王

鳴盛

與盧

文韶

皆言此書傳遠勝唐義疏盧爲校三匝誤字一

一鋤惟嫌體清羸力疾廣授徒穀梁疏倘成孟子義定乎別君居三年我書不盈尺以此厚怨君君行亦當識

章進士學誠

自君居京華令我懶作文我前喜放筆大致固不淳君時陳六藝為我斧與斤不善輒削除善者為我存儀真有汪中此事亦絕倫藐視六合間高論無一人前者數百言並致洪與孫勗其肆才力無徒嗜梁陳我時感生言一一以質君君託左耳聾高語亦不聞君與汪論最不合君于文體嚴汪于文體真筆力或不如識趣固各臻別君居二年作文無百幅以此厚怨君君聞當瞪目

管民部世銘

自君居京華令我懶詣人詣人或有忤時時致紛紜誰能為斡旋並復正色論我病非由他半或飲酒醇君齒逾十年戒之每諄諄畏此一尺面嚴冷無陽春我交有趙莊懷玉述祖我交有楊倫數子亦獻

規使過不敢文餘人非不言言亦或不聞言豈有不同數子愛我真
前時傍君居藉此得束身傭書蘭臺中得免一世嗔別君居二年酒
失屢自讖以此厚怨君君行倘相念

汪學正端光

自君居京華令我懶入山君雖不能遊喜我窮躋攀陟險慮我危懸
樹驚我頑嘗坐白石邊靜日待我還復恐相背馳時喚林壑間每挈
酒與肴解我饑渴顏共艇泛釣臺同車出昭關七十二盤嶺三百六
十灘時登仙人峯時上毛女壇我狂不可遏藉子爲捉攔不然險上
天失足性命殘紀遊實雄奇君誦皆循環別君居三年過山亦不詰
以此厚怨君君時當一噓

酬崔太守龍見時攝處州守

萬里歸來攝一州桃花嶺畔使人愁松杉密處稀耕隴麋鹿閒時滿
郡樓到海怪風聞尙凜愛山狂客記曾遊

丙申秋從王學使至此

官清何事忙

偏甚幾許新詩落案頭

寄崔三景侃三十二韻

昨來遊西湖兼爲訪君病迎門一相見坐語不能竟臥六尺牀朝
曦與相映紅窗闔兩扇尙畏曉風勁藥物貯枕函醫嫌不符症復言
昨攜燈失手不持柄燈燼誤拂眉癩痕額間釘君雖顏色瘁玉骨尙
精瑩竹扇揮不停羅衣最娟淨神清能照物朗若玉爲鏡榻畔數冊
書拋殘未裝訂爲言是君集偶亦取諷詠雲箋蒙四壁愛好實天性
翡翠几插白蓮秋桃花亦倩朱魚貯葵榼水淺喜游泳憐余欲稍憩深
室早除摒阿母喜客來開扉急延請齋廚戒葷殺蔬筍搬欲罄銀梨
手中擘綠果盤內釘傾觴復攜榼一一催使令憶昨握別時君妻尙
初聘今聞娶盈載熾婉並能敬君兄持玉節失喜早相慶仲子昨有
書潛修怕奔競惟君忘進取所喜達時命晚挈臥具來紗廚放端正
辭君不可得連榻話宵靜絮語不覺長疎疎佛樓磬雖癯談尙劇使

我醉時醒一夕話數年奚奴隔窗聽松檼移影徧殘月復窺徑明發
倘別君重來尙難定

九月念一日自府東街醉歸由迎春橋取空闊處玩月歸舍喜而有

作

我從缺月看至圓復自月圓看至缺其間何夕最賞心初八十三今

廿一月當八日剛上弦日午已挂城樓邊私心催送夕陽去好透清

影來窗前十三此夜清輝好遠挈幽人踏衰草是日偕錢竹初莊廷

即偕味辛兄弟自雲溪步趙家樓上千盞清縣尉衙前百燈皎今宵

無意復出遊坐客失喜相攀留是夕值州守余存謙主人初歸萬餘

里塵面未洗邀朋儔歸途正值如圭月照我城東堞樓隙沿溪寂寂

總閉門剩得清涼沁肌骨我生愛月歷八州月色無異殊歡憂中間

多病復沉醉誰肯徹夜懸簾鈎少年二八還三七得月不眠眠若失

古巷迢迢走欲窮高樓漸漸看將徹出門漸遠月漸親千里對月如

鄉人幾回愁苦向之說高興亦引同清樽海門浩渺江流漾看月出
波還沒浪萬斛清光一葉舟誰言我不居天上蓮花峯東玉女盆十
五十六無黃昏齋心曾向石壇坐百怪看月來松門嵩高夜色尤無
匹霜一層蒙尺深雪縵山明月向南來三樣寒光一時結東西南北
遊萬場祇恨不上天中央我疑青天月色不及此有若鏡面皎潔鏡
背無輝光看殘月慘新月歡百歲月止千回圓尙嫌平地住時久起
處落處不得一一窮其端我詩被酒尤清快說月還愁衆星怪夜深
說月更有神引得一番兒女拜
爲史秀才次星賦焦尾硯

硯才係端溪石閩江舟人以支茶竈史君客閩時出錢三百易之
其半尙焦後琢爲硯因名曰焦尾云爾

昔有焦尾琴今有焦尾硯山中木石豈有知不遇才人不能辨琴來
爨下五尺長此亦日久支茶鐺磨之三日故紋出洗以海水逾清光

端溪僞質今無限此石故應稱舊產有時攜向沸水旁蟹眼尙侵鵲
鵲眼史君才大不可量攜硯歷涉天南方興來草辨漢赤壁否亦或
賦秦阿房草堂他日吾當識匣以紫檀時拂拭人生皆作如是觀爛
額焦頭稱上客

偶成

情懷苦被繭絲纏時醉時眠亦偶然誰向西窗喚人醒一房春夢碎
難圓

卷施閣詩卷第八

卷施閣詩卷第九

陽湖洪亮吉著

西苑祝釐集

庚戌辛亥

萬壽樂歌三十六章

并序

臣謹按唐臣元結有補樂歌十章白居易有新樂府五十篇類皆
言簡意深可以播于樂章歌曲臣嘗慕之伏見我

皇上御極五十五年仁如天弘如地舉凡廣聖極神謨文定武類
非形容所克盡致今者恭值

八旬萬壽慶節臣幸得擢巍科備員詞館自正月一日恭讀

恩詔以後親見

皇上敬

天法

祖勤民察吏諸大政足以度越百王而垂則萬世者已不下數十

事輒不自量謹依類撰次爲萬壽樂歌三十六章非敢繼元白之
逸塵亦庶乎衢謠壤詠得附本朝樂章之末云爾

元日詔第一

上章之年月初建旭日初升太和殿

詔宣宗伯上玉墀二十二條宣讀徧九門以外齊歡呼一日數驛馳
郵夫

殊恩豈獨神州內

普錫還教外藩逮遐哉上古迄漢唐三千年來無此祥皇皇

天語真堪述每遇庚年輒逢吉

讀實錄第二

作者聖述者聖天命元年逮雍正我

朝開國值泰交百八十載如一朝夜向晨讀實錄玉檢金函日二復

人言

帝治超軒鴻耑師

三祖及

二宗

巴勒部第三

巴勒一部遠在西徼酪食漿飲同時獻表云敬

大皇帝如敬佛三寶珠瑟瑟衣班班道畢拉兼烏闌哈哩薩野先稽
纒巴拉八都還合掌

坎扒窪經第四

樹頭樓高五六丈其實纍纍花可釀葉各貝葉取寫書一葉百字如
聯珠梵經不到西南部以意作經遂四布國基既北立普哇傳經亦
各坎扒窪坎扒窪經有義不歸佛法不歸僧只願歸依

大皇帝

貢子象第五

南掌所貢

貢子象貢子象人面刺花人性獷遠邦百載名老搗左佩右佩皆雕
爪別乘數象來中華不嘉遠物嘉誠效

特敕象房增俸料

春燈詞第六

昆明湖水連天碧萬盞燈輝一天月臨湖亭上看春燈魚龍曼衍從
東升春燈詞接春帖子遠自乾隆丙寅始辛壬以後皆八篇却與卦
象同綿延生生不已真堪卜今歲自隨還至復年年歲歲游豫同誰
識義蘊陰陽通宸篇下計歸政日却合伏羲全部易

普免租第七

免錢糧免漕糧四次兩次看騰黃今年詔下

恩尤厚普免正供由

萬壽三分減一十減三前史盛事何庸談大農錢粟雖頻散耕九餘
三積儲慣戶部銀仍八千萬

勤政殿第八

夜未央乾清宮中燭煌煌日將出勤政殿前傳警蹕機庭綸閣三兩

賢日或一再瞻

天顏萬幾當晝皆周徧七品宰官多引

見法宮御苑名總同行在亦復懸堂中江寧行宮有勤政堂讀書若以今方古

隻日視朝何足數

續石鼓第九

太學中周石鼓二千年來石文古若將一字比一篇却合關雎及殷

武石鼓舊存僅三百十字親加排比較短長重刻十石陳堂皇舊者藏皮珍球

琅流傳至久還堪數周宣中興製石鼓乾隆

萬壽年春補

八徵璽第十

古稀天子古已稀復越十載符貞期重華宮中製聯句既壽永昌猶

泛語嘉名肇錫得未曾璽章特與鑄

八徵石經若舉殷宗例享國百年重製璽

五福堂第十一

萬年天子兮萬年觴五代元孫兮五福堂儒臣歷檢明宋唐得者六
輩錢吳張士夫獲此慶已長帝籙從未膺斯祥膺斯祥由慶洽十一
世還徵

玉牒

釐四部第十二

四部書帙萬萬提要一百卷臣昉臣熊奉

敕撰全書告竣已十年有

敕亥魯須重編

本朝實事皆求是不遺傳疑留一字文淵畢釐文源百臣日夕來

御園東南三分皆無誤海上然藜校文溯

御製集第十三

御製詩御製文近自己酉溯丙辰文一千詩五萬五十五年成百卷
九經廿史義蘊宣四岳五瀆搜根源遠紹二典三謨傳巍巍卷軸如
山立豈特帝王難冀及十倍漢唐文士集

五國朝第十四

東西南北車書極朝正國王三十一三十一國分年來春秋冬夏邸
第開普天同慶當斯日五國遙遙適相值神雞五色魚八捐貢及犀
兕兼拾獠史臣若舉春秋筆五國來朝王正月

開經筵第十五

讀洪範讀召誥五三六經開秘奧萬幾之暇日一編春仲敬復開經
筵經筵樂奏何雍雍抑詩還取衛武公昔賢
今聖皆先覺九十耄期還好學

親釋奠第十六

臨雍歌幸學詩八十天子猶尊師崇賢坊大成殿二月上丁來釋奠
春渠如鑑波溶溶前年

天子臨辟雍太平盛事皆稽古鄉飲酒歌詩樂譜

朝日壇第十七

朱旗絳扇來城東

至尊親詣朝日宮黃軒紫幄光如燭

至尊親詣齋宮宿太平五色雲擁輪迎日正見雙黃人雙黃人捧日
起朝日禮成天下喜

登岱宗第十八

會稽南恆岳北西及五臺中太室天旋向左

帝邁東州年六徧巡岱宗吾

皇卓識超秦漢但禮天中不封禪天門日觀瑞色開八旬

天子騎驪來

謁闕里第十九

猗昭維則聖人在昔衆善若林六經乃宅猗皇是欽

聖人在今

宗謨既纂

祖訓是尋青旗央央越歲來謁前聖後聖其揆則一歲則庚戌月維
庚辰山左三大禮祀畢臻

百歲民第二十

廣督摺直督摺百歲耆民比肩立滇撫章皖撫章民間五世共一堂
太和翔洽超前代不產麟皇產人瑞朱提文綺出上方
幾餘染翰錫一章耆年壽婦布魯特絕域貢珍由感德

萬壽科第二十一

萬壽節萬壽科九十八十來婆婆娑春官一百二進士外一百人年已

至

詔出東華盡宣賜膠庠抑阨五十年閩苑盡許稱神仙白髮亦戴花
盈顛升平盛事誰能及兩宴南宮值庚戌大學士臣璜謝摺

勤察吏第二十二

盜不讞責總督清苑縣官愆莫贖吏蠹民責撫臣高郵州牧罪較真
皇躬一日周萬幾外省案牘何從稽

詔書直下諸大吏當戒江南與直隸

清字藏經第二十三

西華門中闢經館大小乘經堆欲滿法門先寫百二章排比兩晉兼

三唐

國書結體尤嚴重舉筆如龍復如鳳經成一藏功萬千佛力祚

皇萬萬年

黑龍潭第二十四

三月麥四月秧不雨麥瘁秧將黃

行宮宵旰無時釋先詣黑龍潭外歇排空萬朶雲垂垂真龍不禱雨
不來

三大祀第二十五

三大祀歲必親五十一月象輦陳南天壇北大內百尺燈竿與相對
壇內宮中合虔拜耆民夾道成風謠五十五徧

躬南郊

山莊夏第二十六

灤河之北臨邊牆每年避暑來山莊雲山四面奎文署云是山莊最
高處澄然四海集一心日日亭上占晴陰殿前引見員嘗滿吏部帶
來分月選更撥幾餘念柔遠山莊但識無炎歊日昃可念

宸衷勞

經壇設第二十七

九門中官吏車一日百輦來徐徐殊方絕域摩肩入在籍諸臣亦羣

集分曹百輩爲一班盡檢大寺開經壇湖山郁作梅檀味初日輝輝
照初地青梯樓閣須暫開

無量壽佛拈香來

盛典增第二十八

萬壽盛典凡六門

聖德

聖文兼

聖恩萬方集慶儀文重其次繪圖同獻頌巍巍蕩蕩難具書特徵二
事古所無八徵五代奇祥起塞外闢疆三萬里

夕月壇第二十九

朝禮日來東郊算禮月來西郊

鸞輿親向齋宮出

萬壽節過才一日規壇不獨祀夜明二十八宿兼經星不見唐貞觀

樂五闋隋開皇坎三尺豈如吾

皇大祀躬致虔禮成光景生中天千秋金鑑懸當前

安南來第三十

安南來安南來國統雖舊基新開廣南大吏爲陳奏親詣

天朝祝

天壽路人指點盡識各安南國王阮光平海邦自此知冠履好變文

身與椎髻

阮光平奏請從本
朝章服特旨俞允

前殿宴第三十一

太和門中頻列讌日日平明御前殿七旬宴後復八旬下逮屬國兼

陪臣年九十階一品特

賜金尊殿前飲千人統計歲萬千稽首合作今

皇年就中受

恩誰最樂國子監

臣郭鍾岳

祝嘏樂第三十二

祝嘏樂樂一部歌者歌舞者舞敲銀瓶擊銅鼓萬里遙遙來祝嘏太常樂奏列四蕃不數貞觀兼開元蕃王親向階前祝更獻十章名法曲法曲十可歌亦可謠一章一章名特標謁金門賀

聖朝阮光平進壽詞凡十章萬

昇平寶筏第三十三

三層樓百盤砌上干青雲下無際上有立部伎坐部伎其下回皇陳百戲蟠天際地不足名特賜大樂名昇平考聲動復關民事不特壽人兼濟世萬方一日登春臺快看寶筏從天來

王會圖第三十四

東西廿里如繩直夾道樓臺成頃刻千層覆屋百尺臺大舸載自東南來回廊曲檻天然合空處屏櫺自開闔方壺圓嶠咫尺間海上頓

訝移三山拈毫若準唐貞觀王會圖應添百卷

普天慶第三十五

日庚申圓明園中

法駕陳日甲子乾清宮中鹵簿起宮中御苑石作塗萬叟夾道還嵩
呼如山燈火連湖曲想見太平調玉燭

萬萬壽第三十六

萬壽節日以十三時八月月瑄日徽皆叶律我

皇御極當丙辰越若稽古堯期臻五五數復箕書陳無疆若展大衍
策萬有一千還五百

馮少卿應榴夢蘇草堂卷子

時馮作蘇詩合注

少卿室冷無纖塵頽濱翩然來叩門履聲皇皇響空谷欲前不前猶
躑躅寒簾一笑霜滿空迎門次公立長公長身高冠貌奇古七百年
來覲詩祖邀公不入亦可思一屋光燄皆公詩夢中自謂得所師敬

告欲續施元之公雖不言心已可來處仙雲落如朶峨眉山月清可
憐半夕移挂高齋前來時不迎去何送我謂非真亦非夢醒來急詣
南頭翁謂翁閣學方綱證以畫象將毋同君不見少卿詩名滿人海夢裏師
公醒如在因君我亦念瓣香太白樓前一江水

自蒙陰縣界早發從車上望泰山半日始抵山麓又步行半日憩高
老橋日已曛黑乃尋路而返

夙昔好大言岱宗視秋毫茲來距百里意念肅不驕靈風吹車帷總
向西北飄日上戴一山半白雪未消平明開東峯忽與天爭高向背
卅里間鉅細無不包聖人坐明堂若受萬國朝半日走未休才能憩
巖腰絕頂豁一門注視久亦勞誰云千丈松貼若徑寸苗海氣漬石
厓天聲走林梢來乘西月光去揭北斗杓小酌白石泉吾行過飛橋
臚傳日馬上口占寄畢尙書師湖北

五年爲客曲江頭屢向慈恩寺裏遊曾解綠衫陪廣讌愛拈紅杏上

高樓看花未必輸前度擢第偏教遜一籌好繳公門舊衣鉢至今慚
愧說袁州

昨年里中有入都者偶占五篇寄友海內交舊見之共詫以爲洪體
今適一年余留官京師里中知好復往來不能去懷適汪甥楷以
定省南歸爰更賦五篇寄諸同人末章并以示弟原吉及兒子鈺
孫見者幸勿復以爲創體也

盧學士文韶

里中誰最憶我憶抱經堂抱經翁七十讀易猶琅琅餘經貯案頭日
漬丹與黃盤盤經師居庭草一尺長問字數百人誰來上堂皇匪徒
文體乖書仍誤偏旁俗學錮性靈反厭師說詳一月偶一來惟應伺
餼糧就中領悟誰庶有顧明與臧鏞堂顧生嗜說文臧生勤爾雅百
里澄江中誰如二人者

錢大令維喬

里中誰最憶我憶竹初居前年養病歸買地十畝餘四邊何周遭桃
梅竹棕櫚規高欲巢引掘地乃種魚魚鳥既獲安餘力營吾廬一室
開八牕風日來徐徐主人欲登樓花氣為縈紆主人欲出門芳草攔
衣裾北巷呂秀才景尚南頭畢居士涵偶有剝啄聲經旬一來此

趙舍人襄玉

里中誰最憶我憶味辛齋味辛齋中居風日多好懷五日一出遊經
旬宴朋儕我居與若居僅隔南北街花時與月時出入必與偕君尤
善清談觸緒理不乖差苦持論莊時為雜談諧同志六七人均能外
形骸無日無客來闐敞不必排不來亦有時或值體不佳感惇大吳
堂近南歸莊寶書蔣齊耀復遠宦預苦離別多臨觴定三歎

蔣上舍馨

里中誰最憶我憶杏花樓杏花既已枯種杏人在不雖無一株花花
下石尚留雖無種花人畫象懸樓頭昔為大母居謂外王母今屬孫龔太孺人

會遊孫曾昨問訊敬我齒已優童年看花詩黏壁尙四周種杏會幾
時一讀一淚流檢點樓下人半又客遠州阿三庶雁行阿二廷耀尙
兄事何時續栽花吾當日三至

弟原吉兒子飴孫

里中誰最憶我憶卷施谷拔心不死人時來谷中宿谷中有羣書谷
中有嘉木主人出門去書好無人讀花紅上斗棋草綠出垣腹賴有
主人兒時來理書篋稍移礙簾燕時剪出牆竹昨宵家問至北上期
亦卜愁無束裝具典却里中屋一書寄令弟一書示飴孫此谷不入
券爲吾鎖重門

自題城東訪月圖

余家清暉橋距城東門不三十步出城古寺五六排比而立寺後
爲晉陵縣故址廣場數百畝幽人三兩家余每晚食後必一詣其
處半里之內鳥之有巢花之有名者莫不與余相識卽風雨夕不

能至夢亦詣焉庚戌獻歲將北行友人錢明府竹初畢上舍蕉鹿
爲合作城東訪月圖遂係以詩云爾

月初三至初九一日一回城外走十三以後人不閒人靜月好更先
闌徹夜不遣城門關月過二十看星出乘殘月歸更欲絕人言我愛
月如癡不識城東月尤潔城東有白塢城東有紅橋橋痕下欲枕蘋
藻塢影上直干雲霄迎春堂北東西路一草一花都識數匝月能來
二十回繞堤何止三千步三松一客靜淹留復有危巢結四周好寄
吟魂與烏鵲夜深隨月上城頭

張進士若采梅屋讀書圖

築室高丈餘鑿楹深尺一我愛一屋中書外無長物無心種桃李無
心種桑麻我愛一屋旁梅外無餘花書牕只向梅邊拓果熟好從書
上落長身如玉忽然來不是主人疑是鶴

送莊通判斫至漢陰新任

太乙從西來終南向東轉我前甚羨君十宰山水縣

君歷宰郿鄠宜君盤屋富平長

安咸寧渭南朝邑諸縣今擢判漢陰高觀潭上銘牛頭寺中詩君前亦羨我五醉桃李

時花枝歷亂山南路紅欲上天雲轉妬君從山縣偶然來一路尋花

入韋杜黃河西岸渭水隈我頃亦復騎驢來

君官郿及整屋朝邑君時余皆曾至其署中

家令子亦好友十日留飲三千杯仙遊壇北風飄瓦君坐藍輿我騎

馬意外孫郎手重把慈恩塔下日炙軒君摹石刻我上巔拍手尙有

婁江錢

謂獻之

尙書賓從居然異醉裏後先升上第萬條紅燭百篇

詩贏得人傳杜書記識君已卅載別君又五年重陽風日正晴好相

與共話金臺邊治中別駕今何有五十才各作通守鄂杜山田買不

成全家更進褰斜口離筵重傍菊花開適有尙書信使回畢竟梁園

賓客好如今視草用鄒枚

吳布衣蓬癡寄示紙仿秦漢瓦當爲題二絕

陶泥作瓦形難古

近西安陶者能燒漢瓦當與真者無二

爛紙爲泥法轉良總是劫灰

燒不盡有人閒裏仿阿房

應共錢

獻之

程彝齋

作雅遊青門西去曲江頭蠻牋十樣如分寄君

定能成五鳳樓

送李同年賡芸赴任浙江

上章闈茂歲科舉由

萬壽我方登岱宗三月乃北首遊山筆殊健得逐衆賢後同舉一百
人于君契尤厚君才富詞藻早復窮篆籀闈中萬言策兩策蒙進奏
春官遲錫讌新例試當覆

光明殿東西

賢良門左右

聖人親試士如漢策孝秀衆中君最捷一卷成正晝引見來

御園麻衣改紳綬人才較清拔竟以民社授官由楚改越

以親老
改近母

老欲遷就十月始出都風號雪花驟同袍凡八輩執酒道旁候疲馬

出北門依然學寒瘦阿翁循吏傳君尊人亦以進士宰江西有惠政車上可尋究努

力報最先無徒事琛賒軒倘重到舊侶可全觀郎官改祕閣此例

亦有舊二十有七人今歲蒙恩入館者共二十七人待子成列宿

王大令復自汴中來邀同人小集惜陰秉燭山房羅布衣聘作圖紀

事是日并送儲明經潤書南歸分韻得租字

有客歸何急疑收陽羨租似君來正好還挈朗陵廚官滿趨金闕春

濃買玉壺朝衣吾幸典衫笠入斯圖

十五夜對月獨坐有懷里中舊遊

獨酌一樽酒含情上小樓故人難會面明月却當頭隻影長廊入清

輝滿鏡收誰云天上好今夜不勝愁

送萬大令應馨之官廣東

謫仙樓頭乍相揖君年三十我二十初識君在朱竹君先生節署下所云高顧張黃皆署中客也

平山堂外飄長裾君年四十我有鬚廿年歲月真如駛高東井顧文

子張方海

黃此中死卽今海內論心交汪子

劍潭

憔悴孫郎淵如豪

馬蹄亂踏長安市前後與君成進士若論位置殊可商君爲外吏我漫郎一官遙遙六千里三月仍難具行李僮饑馬瘦住不安我轉質衣謀爾餐孫郎汪子交終厚日揭破車門外走窮冬行色略已成此時送君須出城崇文門前別不足更借宣南坊裏宿故人有子稱能文謂仲子則子昨歲主我今依君君不見貧交生死原非偶此子年來況無母君先令讀等身書我爲故人兒娶婦

錢同年福胙乞假南回書此送別

君歸我何憶我憶西湖水飲水亦已香水中菱更美湖中誰最憶我憶裏湖魚小繫雙篷艇時來五柳居湖頭誰最憶我憶山陰酒一葉載百罇千錢沽十斗湖邊誰最憶我憶上山茶煎向深甌內如開數朶花預想君歸時食單先出宅烹魚水要鮮醒酒茶先摘此時却憶金臺人無米飽飯天街塵人生快意當有日君倘能來我應出

崔公子景僊竹樓圖

竹綠參天筍亦抽偶然竹裏有高樓不知樓上人何處我欲打窗尋不休

三尺寒檠七尺牀阿三曾共捉迷藏

謂令兄景僊

落來畫裏還相識爲我

窗西補夕陽

袁安臥雪圖爲王太守嵩高作

屋頭無炊烟門外一丈雪此時屋中人已恐不能活永平及永元三世弼天子此時屋中人如何遽能死閉門一臥歷一時門外雪深殊不知洛陽縣令來何巧從事汝南饑欲倒門外雪花飛入竈從茲舉起一出門衣被四海皆陽春眼前高臥匪無意預想俗敝當還醇君不見丈夫一世歸懷抱有事日多無事少卽論無事亦須眠那得閒心訪安道

三月廿五日小病初愈至法源寺看花適得崔三景侃書却寄

剩得韶光有幾時病餘端不負花枝商量欲把春衫典又值微寒颺
兩絲

幾日人閒蝶却忙引人花底款遊廊傷春正憶昨年事迎面一枝紅
海棠

冥蒙花外語呢喃燕子真同佛一龕千尺綠陰吹不斷粉紅牆北是
江南

鶯鶯燕燕可憐春乍款花枝乍款人無數亂紅飛上柳更疑楊柳是
花身

一春心事費商量欲趁春陰夢幾場花上曉星花底露分明著眼看
年光

春盡傷心抵歲除江南別後意何如丁香花底懵騰醉却展崔三二
月書

五月初三日偶成

蜀葵如錦粲籬根檐雨初添屋漏痕新月乍來簾正捲槐花落盡不
開門

五日憶白雲溪競渡作示兒輩兼寄錢三趙大里中

黍裹菰蒲酒泛芸薄醺閒話小兒羣江鄉四月饒新雨樓閣三時盡

白雲溪果作紅偏礙帽岸波搖綠欲煎裙誰憐天上清如水手擘桃

符遠憶君

送丁二履端南歸

白雲溪水向東流我住南頭爾北頭小市酒帘頻夜飲斷橋蠟屐共

春遊竭來天上愁無盡却惹人前罵不休屈作宰官原可惜時擬偕崔曼亭

太守至荊州以教習期滿以知縣用而止也應差勝客荊州

法學士式善招飲詩龕并至西直門看荷花卽席賦贈一首

翰林近日詩名盛遠有詩龕近詩境翁閣學方綱額其齋曰詩境詩龕主人尤嗜

詩退直閉戶唵多時

龍樓鳳閣森前後尺五天邊住偏久五陁山色落牆頭時有閒雲墮
高柳開門十頃荷花潭邀我早日同幽探啓明星落已催駕我本蓄
意來詩龕馬前遙遙兩紅燭十里路中晨睡足詩龕已到不索詩舊
讀主人詩已熟東頭詞宗百菊溪百侍御齡宗伯宅復連街西鐵侍郎保三人
分日操選政時有滿洲四朝詩選一室墨雨揮淋漓以詩存史誰能及佚事多
年苦搜輯遺山已矣傳習亡北斗以南惟此集清談已竟還傳餐飽
食散步來河干城門正對御河口萬柄荷葉風聲搏官衢南北車如
織騎馬欲歸歸未得青槐影裏晝初長我亦玉堂將入直

七月初四日遊極樂寺看荷花分韻得看字

出西直門三里而近有極樂寺焉長河蔭前高阜倚後其東有國
花堂西有勺亭皆城外之幽構也梧門學士以偶日下直徧招同
人飯于詩龕接軫以往車行者三里舍車而徒復二里甫抵寺門
綠陰當空赤日亭午池荷東西曾不百步間以傑閣繞之回廊水

氣升岸結爲輕綃林香入波漾此晴采于是或瞑坐巖側或孤行
竹中或擘箋庭隅或讀書塢側堂高于垣者一尋門低于砌者百
級重寮洞開直視十里負戴而來者望之如鷗乘軒而過者擬之
以艇坡塘高低岡阜回互香氣拉雜雲光降升促織繞砌聲如碎
琴風蟬過枝韻疑零鐸遊藤綿延上樹皆紫細草芬郁拊花必黃
乃蔽炎牖爰開北窗松露尙零柏風成陣家京國者雖然有雲表
之幕宅南中者又恍然有江鄉之思焉林陰屢移羽觴乍接果則
紅暈徑寸與藏冰而共升瓜則生黃滿盤汲井華而并薦陶令之
榼無時不攜韋公之筵適心而飲相與商確今古縱談雅俗據石
命句臨流作圖幽襟旣抒勝賞斯愜又破曙而遊薄暝始返星河
滿空影乍曳乎籠燭雷雨在後勢忽掣于軒帷此又晴晦出于一
時涼燠交于俄頃者焉同遊者爲許封君兆桂張運判道渥李刑
部鑾宣何工部道生吳明經方南及梧門學士與余凡七人運判

既爲之圖余因序其顛末云時辛亥年七月初四日也

長河萬柄紅荷花匝月不來開已半花枝似嫌河水窄幾葉亭亭欲
升岸初陽入浦看難定十里雲光自凌亂寺門南下景最幽可惜年
時水波斷田田葉瘦花枝悴我欲重煩桔槔灌新秋天意亦可知雷
雨急將新水換別來花不忘前約一朵迎人出橋畔東西燕剪掠不
停惹得盤珠落無算鶯黃鷺白來成陣一一見花如欲喚花香深處
朱樓好檢點新涼放詩案明朝無用騎馬來畫取花枝卷中看

送趙大令希璜之官夏邑卽題其三十二峯詩集後

昨來卸輕裝今復馳急騎牛腰詩卷行必偕復恐人呼作塵吏趙生
三十詩名早脫手羣公已傾倒黃生謂仲租屋與對門五夜疊誇詩

句好爾來十載官長安君行入關我出關終南太華昔皆歷所恨背
我遊梁山搜奇剔勝狂如馬好古如君亦應寡摩天欲覓秦昭箭掘
地能尋漢宮瓦山南山北行不休官好到處容勾留幾年頗喜善摘

伏一事可慚同摸邱盤盤法物歸樽俎奇字入詩詩愈古我披三日
手不停可惜良朋已黃土指仲則歷官差喜各區多昔傍陸海今黃河
譙城北去黍邱在不日佇聽疲民歌河流日夜奔馳速此土年來亦
非沃故人一語欲規君好破夜唵披案牘

跋鐵宗伯保容臺詩卷後

梧門學士交何遲乍見示我容臺詩宗伯屬梧門學士轉示亮吉容臺詩名高北

斗三百二篇如一首誰言官貴詩難工此卷半出雲霄中

西清南苑日趨侍日月滉漾天花紅橫山北上灤陽道眼底萬峯青

不了直廬夜半忽朗唵拔地倚天長句好琅邪參政劉尚書嘉禾翁錢侍

郎詩名海內歸秩宗先生健筆復軒舉要與冀北開宗風萬條紅燭

聯官騎正好同官有難弟閣學玉保玉河斜月午門鐘馬上百篇成復易

我前讀公詩今復隨公遊殿頭作賦公最賞可許執筆從螭頭君不

見丈夫事業垂區夏豈僅曹劉與方駕他時一品集編成我欲作文

同鄭亞

法學士式善山寺說詩圖

茅屋十數間青松百餘樹昔為說法場今作談詩處說法祇了生死緣不若說詩能使死者不朽生者傳倘同天釋較功德一瞬萬古殊相懸梧門學士才名勁說法亦同僧入定席前傾耳凡幾人木佛都疑座旁聽談深不知寺在山高論往往通天關指揮若假鐵如意花雨欲落茅檐間詩龕左右詩如海時選近人詩丹墨紛披幾年載他時悟後忘語言更有不傳詩法在

送周同知世紹回西安

詩名宦蹟廿年中雅與高三十五同

君行二十五年故云

雙節正堪膺上佐百

篇曾共賦東風同官一輩憐亭長

錢獻之自號閱音亭長時宦况甚苦

因爾連旬夢石

公

君與張舍人石公交最厚

欲別更邀通夕飲城頭殘月已如弓

贈陳方伯淮

十年兩度謁行旌，叩閣皆逢失喜迎。
殘雪尊壘滋水驛，經秋風月武昌城。
詩名早見題襟集，世澤欣承曳履聲。
倘許從容話鄉里，鵝籠我本舊書生。

偶成

白露甫三日，闌干著意涼。
偶然飛雨至，花亦點頭忙。

雨中答法學士見懷之作

重門三日雨，百鳥響俱寂。
秋館渺無人，青苔夢行客。
閑房夜難寐，矯首望城北。
昏霧接半天，連林色如墨。
遙憐通德里，定閉草元宅。
瓦燈紅一盞，砌草荒三尺。
應有苦唸人，披牕檐漏滴。

卷施閣小集

秋樹脫一葉，素心來幾人。
將以屐齒頻補此，閒庭春閒亭立多時。
一客入門喜胡蝶，亦翩翩飛來客懷裏。
斜陽倏西頽，新月已在東同心。
六七人團坐秋陰中，秋陰何離離。
一榼傾未了，幸有石上藤先扶醉。

人倒屋南青梧桐屋北雙株槐諸君欲言歸正好月滿街

十三日張運判道渥招同人小集分韻得露字

長安路花無邊酒無數醉中陶陶十年住酒客家家識門戶西風幾
徧吹酒人去何處今朝花下飲忽復思前度主人愛客黃金富何不
先將酒人鑄長安路人生行樂須及時君不見屋角殘星草頭露

中秋日無月獨飲

中秋月一年無一年有有月卽出門無時滯盃酒離離雞冠花短短
鴨脚草秋紅旣傷心秋綠如何好秋雲吹黑入酒尊長安比來無酒
朋坊南深冷一間屋判與無月還無人闌干影外初停雨舞罷筵前
小兒女我有心情梁燕知三更尙作將離語

十六夜有月

幽人喜新晴屋角看星影巡廊才數武圓月出西嶺白雲東西飛不
停七里壇樹秋烟平危樓驚起白蝙蝠似曳足練空中行天橋南北

千家宅萬瓦參差月光濕柳絲如沐草垂珠添得碧苔無限色微風
吹空月流波山翠落向城隅多清輝入掌覺微膩衣上似復傾銀河
歸來敞南軒傾此一榼酒三更靜後無一人却喜戴頭惟北斗北斗
未落客不眠一榼酒盡愁無錢光明如此不須燭却把道書梯上讀

卷施閣詩卷第九

卷施閣詩卷第十

陽湖洪亮吉著

秘閣研經集

辛亥

南樓憶舊詩四十首

并序

夫鳥以高爲巢魚以深爲穴居魚鳥之中者人也築基九層而上
爲之樓則與鳥爭高矣濬池十仞而中爲之島則與魚競深矣然
鳥啁啾而爲巢使無增繳之患則終歲猶是也魚屏營而爲穴使
非芳餌之誤則畢世無易也人則不然飛狐落雁之嶺八埏之險
也鳥所不能飛者人或上之矣奔霆浴日之區九州之浸也魚所
不能歷者人或過之矣則夫陟險不已將迷東西揚帆倏來杳無
津涘當此者其亦有故巢之戀在沼之思乎南樓者外王母龔太
孺人所居也余以孤童幼蒙鍾愛年未毀齒從母移居姊越十齡
第才匝歲魯國男子方驚毀巢漢陽孤生未歌窮鳥由春徂冬衣

無單複之製以夜繼日瓶無逮晨之糧熒熒焉蹶蹶焉蓋十五年
于此焉若夫雨龍竹馬瓦狗泥車探春燕于棟頭捉秋蟲于徑裏
崗睹跳而將平井投瓢而欲滿臨溪兕鴨涉渚撈蝦既兒戲之無
方亦童蒙之求我此一時也隨母梳頭之歲從師識字之辰烏焉
混于一篇蚯蚓登于半紙藏書之篋時匿意錢衣帶之旁私攜面
具同學則謝家阿買送餐則裴氏小奚盼日影之不西怨鷄聲之
太早此一時也至乃歲值元枵門憐奇窘仲理則廚難耗鼠史雲
則釜欲生魚井淘麥屑反避知親徑拾墮薪偏逢長者然而天青
入牖水綠周堂秋月塞門春花交砌何嘗不破啼而四顧擁絮以
周遊此一時也又或蘇季上書全家盡返桓姬索米半舫爰來謂
齋舅氏及適中外則雙丁二到不乏奇童弟兄則羯末封胡并饒
楊氏從母道蘊虛堂論史鵲亦垂頭側徑敲詩蟲來嚙踵篙師南巷雅乞書
符蠶妾北頭偏多問字此亦一時也授徒北館作贅東堂卜商色

養之時賈誼秀才之日曾稽僚壻動色而見巖生陽元尊章改顏
而親劇子鄰有束紉之饋室無戛釜之聲闢竹徑而待賓借柏堂
而謙客此又一時也詩曰維桑與梓必恭敬止又況螟蛉果羸之
場與松柏薦蘿之所乎此則明明如月難忘在闔之辰悠悠我思
無踰樹杞之里遺聞傳于廝養瑣事得于鄰童畦栽赤莧則前上
之蒼頭穴識金環則羊家之故媪失簪楚國墮履徐方燕知春社
之人犬識衰門之客延陵之劍無封樹之堪懸班惠之書有篇題
之可認能無墮傷心之淚鐫思舊之銘乎又況臘頭社尾上巳元
宵餅值春辰鮓名令節楊柳半橋之月芙蓉北市之燈水增一尺
則已嚙閨門樹密三重則隱開樓扇燭龍之首與鷗尾競高彩鷁
之竿與神燈並出販脂鬻粥擊鉢吹簫莫不紛至沓來風馳雨驟
此又晏嬰之宅因近市而居奇虞氏之樓以臨街而角勝標孝侯
之風土記荆楚之歲時差可連類而書削牋以奏者哉詩四十篇

稿成以寄巡檢二兄上舍三兄文學四弟凡為此者亦所云寄魚鳥之思今昔之感也

沿溪樓閣枕南頭溪水迢迢自北流怪底近來鄉夢好一旬多半杏花樓

載來塵具不盈車孤另偏應託外家絕似幾番霜信後一枝籬落寄

生花余家自追贈先會祖大同城工核減帑項田產悉入官至先君子下世遂無乙椽可居

循廊三折入層梯板屋居然判畛畦不向大家廚索米自泥新竈小

樓西外王母以南樓西偏一間令太安人率余兄弟及三姊居之

七齡入學感孤兒逃塾先教都講嗤燈下國風還課讀始知阿母勝

嚴師余七齡附學實君舅氏書塾蒙師為憚牧菴先生外兄肇新則學長也

婉轉隨娘識百憂貧家照水亦梳頭不知梁燕緣何事却怪春人懶

下樓此言諸姊隨太安人作苦終歲不下樓也

三月青黃不接時燕南書札寄歸遲朝來欲糴桃花米已報租船到

水湄外祖母田不滿百食指浩繁每及缺乏時素園舅氏館于京師亦間寄修脯歸供贖乏

黃泥牆北颺街塵簫鼓嘈嘈聽未真清曉上書還未半巷頭不放看

迎春

夜寒窗隙雨淒淒長短燈檠欲迷分半紡絲分半讀與娘同聽五

更鷄余八九歲時自塾中遣歸每夜執經從太安人紡側讀恆至漏盡

一年多半住江邨饋歲匆匆入里門不待郡城元日到江船先已送

河豚此謂素園舅氏妻楊孺人江陰楊文定名時猶女也一歲歸寧時多惟蜡臘乃回

十齡左右謝家甥孤露偏憐易長成縮得一般雙角髻家家戶戶拜

新正

侍郎宗派號東莊愛女先教住近坊便了作奴如願婢有人分日饋

羹湯此謂適莊氏從母事外王母最孝常分日饋羹

西頭阿姊慣留小極扶梯不上樓約得走橋諸女伴背人月午更

梳頭

天中節後賽神多十六雲車次第過剛是卷簾迎面看水嬉又報進

城河吾鄉雲車相傳隋司徒陳杲仁守城時所創今司徒誕日及賽神皆設之城內外凡十六坊故數亦十六

迎門西去徑欹斜曲曲房廊被柳遮一尺井闌涼沁骨記曾團坐說

人家外家門西偏有井最清冽近聞已湮矣

清明過了又端陽母不梳頭針綫忙幾日斷餐緣底事疊錢來買束

修羊吾鄉從師者饋束修常以清明端午九日及歲除為四節

衆裏聰明百不如學將新樣寫神茶比鄰一半迎春帖乞取蕭郎弱

腕書歲除前數日臨溪三五小家每將紅牋乞書春帖子

久別都應見面生相逢幾徧問年庚早來阿母房前過親切重聞喚

小名此指適河橋程氏姊姊為曙齋舅氏次女與余同庚從宦京邸十年歸而問齒長幼故云

江鄉豐歲景偏饒親製連環小樣糕一榼牢丸三百顆歲除筵上吃

元宵此指適楊氏從母居城東鄉芳茂山下歲除嘗饋外王母餅及粉丸外王母以分給諸孫及余等粉丸俗名元宵

走索人教細馬馱十番纜了又秧歌臨街樓上懵騰坐要看魚龍徹

夜過

樓前為縣學場每春日百戲俱集

問訊廚娘去不回歸寧百徧使人催五更枕上春波響知是山橋艇

子來

從母楊自婺居後隔一二歲始一歸寧外王母必遣人促之方至

樓前楊柳最依依樓下人家試袂衣那識清明好時節滿樓胡蝶雜

花飛

雲溪清明前後風景尤勝

尋常不放到門邊生小都憐疾病牽記得廿三逢縣考小心囑上渡

頭船

此指十五歲時初寄籍陽湖應童子試也

連塵北出竈新添疊日齋廚課米鹽買得呂家新宅子小房分住白

雲尖

曙齋舅氏出後從外祖文元遂徙居白雲尖

新裁錦襖束當胸競渡先將逆浪衝日午晏公祠外路暖波初試小

青龍

吾鄉競渡最盛以余所見不下十餘有金龍小金龍青龍小青龍白龍及五色龍諸目

別開池館隔重牆半種芙蓉半海棠留得一方明月在倩人涼夜捉

迷藏

此指從舅氏啓宸先生所居在南樓西偏饒有花木余幼時常與中表寅谷定安等嬉戲于此

社公生日是來朝已聽沿門畫鼓敲今歲燭龍添九節簇燈還插滿

池菱元宵及社日並有龍燈自三節至九節不等其簇燈之佳者俗名滿池菱

八字門偏路復義春陰曾不隔窗紗冥濛添得牆頭黑知是東鄰皂

莢花此指從舅氏秀君先生所居在南樓東偏鄰有皂莢一株覆屋常滿

塵土真疑欲污人尋常衆裏亦嫌身蓬門一例先教鎖明日高齋會

六親自移居後外家有大謙集太安人常鑰余兄弟于室中不令出

一條幽徑幾家通徑轉偏憐曲似弓攜得紙燈何處去石榴廳北捉

秋蟲外家東廳側有長巷一條門凡三四從外祖永嘉及從舅氏于璜先生等並宅焉石榴廳即從舅氏居也

銀泥榻子粉紅牆蛺蝶遊蜂爾許忙一陣暖風初過處百花齊撲曬

衣場南樓後有隙地一塵為諸宅曬衣之所

纔過中元又下元賽神簫鼓巷頭喧年來臺閣多新樣都插宮花扮

杏園賽神會中每用七八人扛一棹上扮金元院本諸故事名曰臺閣

手簡先蒙羣從招郭東明日合登高晚來乳媪床頭說好吃倪家九

日餒南樓外臨水有小家住宅三四其一以賣餒為業倪姓即乳母王氏女夫也

新來小婢勝樵青識字依稀認一丁乞與百番書紙仿章郎十五擅

書名此指素園舅氏自江西罷任回有浙婢名小丁最慧常給事書堂故云

一室如瓢枕水隈綠楊影裏小門開紙鳶脫手人驚散却值先生曳

杖來外家書塾名團瓢書屋

昨宵短至飲梅漿功課新添日影長還喜學堂人散早初三新月上

紅牆南樓迤東即學宮繚垣

槁子通明刷絳紗小庭三面放秋花已涼天氣清如許約伴今宵守

月華庚辰辛巳歲後值中秋日每與外兄弟鴻三定安重光等及外家姊妹于南樓守月華恆至徹曉

除夕初開讌喜筵諸孫合隊拜床前有心欲乞奇書讀辭却朝來押

歲錢歲除日選青錢結百索賜小兒名押歲錢亦名百索

園扉斜對禮門開纔著襪衫馬已催惹得比鄰皆注目秀才初謁泮

宮來此余初補博士弟子員日也從舅氏園門與學宮禮門正對

露滴新紅水染藍兩重門裏試單衫薺花撩亂春如海記得年時三

月三吾鄉諺云三月三薺菜花兒單布衫

只把聰明譽愍孫說將孤露便聲吞紗帷寂寞庭花死垂淚頻過通

德門外祖母以乾隆丁亥十月晦日下世不數年樓前杏花亦萎

題張同年問陶詩卷

同輩二三子詩各有所優或優春夏氣亦或優于秋惟君一卷詩盡
把秋氣收讀詩亦不同候有昏與夙或當暎疎星或欲秉明燭惟君
一卷詩宜剪秋燈讀昨攜君詩歸氣候已迫冬翛然一室居四面皆
秋蟲又疑秋鳥鳴嚶嚶滿寒空此聲非出砌此聲非出籠有聲亦無
聲均出詩卷中秋燈乍滅還乍明時復朗誦時孤行思君此意不可
得無乃造物賦爾偏多情燕臺住十旬蜀道遠千里思親兼念友悒
悒何能已我欲借春氣生君十指間方君作詩時桃李皆開顏迨余
讀詩日花色猶斑斕然後登君堂飲君酒我狂可百樽君捷亦千首

謫仙和仲二公皆蜀人故云並庶幾若說今人已無偶

附原贈作

張問陶

翰林昔未遇名高神采王歌聲塞寰瀛筆與嶽瀆抗今春同拜官
識面鑾坡上示我紀遊詩雙眸豁層障墨雲騰十指一往但奔放
崧華想嶽崎江湖寫清曠眼前真實語入手見奇勗五字作長城
騷壇踴名將我生齊楚間望古心無讓衣染泰山雲帆迴洞庭浪
年來苦饑走轉喜遊蹤暢足跡半人寰舟車隨所向夢中窺海日
愁外看雲嶂方域所區分鶯花亦殊狀方知詩律難一得終無當
小技具神工乾坤歸醞釀軒然讀大作一片宮音亮萬象羅心胸
此才胡可量詩人遇不窮名士語何妄努力頌昇平殷勤副時望
長至前一夕久坐待張同年不至兼懷里中舊遊拉雜書畢不覺破

曉

三更正懷人一馬嘶過巷失喜自啓門正與馬鞭撞馬鞭東指客面

生孟浪客前還致聲入門無聊出門走更向西街市春酒歸來風葉
隨打門打門童驚欲詈人僮癡貪眠客貪起十二曲闌行不已隨闌
一曲酒一盃靜若主客相追陪青天淡淡雲如掃月光畢竟江南好
金波樓閣紅闌橋去年此月還此宵相思不獨人如鶴兼有野梅初
破萼梅枝開落未一年轉眼客路成三千人燒銀燭朝天早我典金
貂猶醉倒坊南遠客期不來不覺一窗先白曉君不見我居咫尺郊
壇中壇外雲氣升如龍更殘烏鵲不敢東
天子今夜居齋宮

附

張問陶

臘月十三日與朱習之石竹堂錢質夫飲酒半夜忽有作道士裝
者影門掩入視之則洪稚存也相與痛飲達旦明日作詩一首分
致四君同博一笑

勝侶偶然合何妨一舉杯南隣朱老聲如雷大呼僮僕無遲回曼

卿亦復隱于酒錢郎爭勝惟狂吼閉門歡笑儼一家掃除賸客如
掃帚回看好月來窗下更洗清樽同卜夜肴盡將擒寺狗烹壺傾
又向鄰僧借客貧歲暮時搔首豈不懷歸愛吾友任他風柝響三
更密坐談心還執手何處微風入開簾若有人羊裘氈履五柳巾
莊嚴妙相如天神大叫取酒來四座皆逡巡疑是唐朝酒人李太
白不然定是荷鍤所埋劉伯倫屋漏之神或大笑公等無鑿混沌
之七竅樽有餘瀝且澆之乾坤浩浩知爲誰吁嗟乎乾坤浩浩知
爲誰醉中各化飛雲飛

十二月初三日雪霽邀同年張問陶顧王霖過飲醉後作

牆東半畝園雪積難置足客來門亦鎖護此一庭玉高低枝上白萬
條愛惜不遣兒童搖今宵却初三新月出牆腹峨眉山下人聞來訪
庭竹掃此枝上雪迸作盃中春冷飲亦可堪胸次饒春溫閒中富貴
誰能有白玉黃金合成酒屏除童僕不入門行酒却驅坐上賓公榮

不飲亦殊苦罰作怪禽筵上舞牆陰一尺掃不開醉便埋此何須回
一層銀燭輝一層新月影樹頭屋角看更奇倒射清光百餘頃主人
不送客亦行脫略酒後皆呼名來時衣上黃去時衣上碧來乘斜陽
去月色君不見人奇馬亦清到骨嚼我海棠枝上雪

附同作

張問陶

臘月初三雪後拉容堂就穉存飲酒醉後酣臥雪中不知何以遂
至松筠禪院五更酒醒見案上有朱習之方茶山名刺僮云此二
公者昨日戌時過訪坐此室中談笑久之乃去主人不知也因細
詢昨日事僮云主人在雪裏時但聞洪顧二公呼李太白主人在
床上時但聞朱方二公叫劉伯倫而已

賓主威儀一笑空酒杯嵌入雪當中大家伏地同牛飲直有無懷
已上風

錦衣玉帶雪中眠醉後詩魂欲上天十二萬年無此樂大呼前輩

李青蓮

何人負我入輕車
混把空門當敝廬
寄語鄰僧須看樣
非仙非佛是真如

上帝敲門也不開
偶然醉死亂書堆
比鄰二妙真多事
悄入遊仙夢裏來

張同年將乞假歸蜀醉後作兩生行送之

一生居坊南 一生住坊北
車聲馬聲不得停 十里路中常若織
我馬見君馬鳴聲 一何高君
僮與我僮望著手 卽招我來時
多子來少馬繫寺門
僮醉倒青天如磨旋不休
醉裏有時來打頭 心癡直欲走天
外 下瞰日月方開眸
朝沽三升算 盈斗吸盡東西兩
坊酒 朝衣典盡百不憂
尙有身上青羔裘 一生皇然開笑口
那著酒錢街上走 一生無聊想更奇
酒盡伏舐壚邊泥 有時忽下牀
有時忽出門 人來雪裏衣盡白
疑是送酒柴桑人 幕天席地原無礙
十萬人中兩人醉 醉中

珍做宋版印
分手亦不辭淚墮黃公酒壚內君不見長安莫復輕酒人酒人腹裏
饒經綸容卿百輩等閑事爛醉尙復噓陽春一篇我作臨行曲馬帶
離聲僮欲哭從此長安少一生酒星只照南頭屋

附同作

張問陶

讀君兩生行涕笑一時作黑夜關門讀不休打窗奇鬼爭來攫懷
詩急走心茫然遠登雲棧如登天人言彼土卽吾土藏詩可以經
千年我方欲西行一星墮我前戴罇衣甕佩龍勺俗客驚駭疑真
仙莫驚鬼奪詩我爲公呵護且復立斯須和此好詩去是時下界
冬已殘風狂雪虐天漫漫一生牽衣愁欲絕一生和詩嘔出血城
南萬柳禿無枝天詔酒星縮離別重讀兩生行如見兩生情一一
若吾語大痛難爲賡翩然一躍入杯底繞地萬人呼不起生瑜生
亮偏同時萬古之名今已矣酒星抱月來擲入兩生杯兩生驚起
糟邱臺歡呼轟作隆冬雷忽聞門外征馬語兩童泣下紛如雨馬

聲高朗童聲俯似訴兩生離別苦一生聞之悲一生聞之喜兩生
悲喜人不知天外浮雲地中水君不見開天盤古氏其情最可憐
九州莽莽無人煙獨坐獨行一萬年又不見高真之居亦孤寂舉
酒招人人不暱九天費盡百神謀僅奪唐朝一長吉兩生把盞同
軒眉居然日日相追隨一生偶送一生去臨期何必吞聲悲我馬
莫憐君馬獨君僮莫向我童哭雲天萬里好聯吟共把長空當詩
屋

再送張同年一律

更從何處別且復上高樓一世真遊戲二旬偶滯留已超生死劫難
破古今愁何日青天外同君一舉頭

附同作

張問陶

吸盡都城酒萬杯此行原不算空回眼前醉語天收去別後詩情
夢補來小住談心孤月滿狂呼拍馬亂山開思君他日書千紙定

向峨眉頂上裁

小除日仿唐賈島例與張同年問陶祭一歲所作詩並屬王文學澤
爲作圖各係以詩

君詩四百篇我詩六十首君詩苦多我苦少差喜流傳同不朽我年
二十登詞場接詠已有橋西黃仲則晏公祠內祭詩處一屋神鬼皆
憎狂生年二十九奇肆是日孫郎號同志筆壓南山白額愁挺鋒復
把生龍試燕秦楚趙遊何壯所不能臻祇天上風月千場酒萬場醉
中歲月偏奔放爾來四十氣已降筆陣敢詡今無雙異才爾復出西
蜀百斛龍鼎邀同扛前年同客龜山左我不知君子知我直待蓬山
頂上行相知一世方能果我詩與君詩識者不能別雖然我自知與
爾陳一一長江一萬里先瀉君門前若論飲水源我較輸君先一年
三百日日日有昏曉若量日出時我比君家早君如吸盡江水源使
我門外朝夕無奔湍我如繫住西馳日令爾屋頭終古長如漆我放

白日西爾蹴江水東高高下下總無極與爾分半填心胸爾筆何處
架青城與峨眉我硯何所支黃山與天台天公夜半笑口開餘子位
置綦難哉此時一瓣香裊入九霄碧惹得千家與萬家如椽紅燭都
無色君不見黃郎黃郎已前死不及見君詩百紙孫郎雖狂一字無
見爾亦作奇人呼今宵約不來苦說有官事坊西令我走不休欲拉
閑人作陪祭醉中一客爲作圖更遣一客題分書時朱同年君不見
門前車轍痛掃除分付鬱壘同神荼今夜俗客不許來催租

送張同年問陶乞假歸蜀

并序

乾隆五十六年歲在辛亥二月朔日同歲生張君問陶乞假歸蜀
其及洪亮吉采玉田之蔬挈山陰之尊送之于國西門曰足下家
居遂寧婦留成都鼻子遠宦已傷親心纍臣贅秦復悲身計然則
足下辭金門而南邁並赤日以西馳勞乎此行蓋非能已仍復迂
道密洛戒途雍梁爰謀裹糧並訪親舊西嶽道士留之而不能東

方細君隨之而共反百武之外弱第出迎一門之中密親咸萃解
笏金而貯案被采服以娛親雖嚴生告歸相如乘傳不是過也又
足下宰相四世孫也葛侯冢畔八百之株尙存召公祠旁一隅之
宅能割谿茶可采則病婦攜筐山筍欲抽則衰年補徑秋原半頃
稅給于王官春韭一畦食供于家老而且煮米作糲春麥爲羹以
資餘人或給耕者甫生之犢等愛于孩提頻來之燕視同于親故
則亦物我均適心形兩忘者焉又況蠶經禽演不乏奇書蛤港贏
田別開精舍臘頭宴客社尾迎神朝衫忽著則鄰里詫觀縣令偶
來則牛羊驚竄南軒旣闢北牖時開果落枕前花開鏡裏一林百
樹招鵲辭雅雙澗疊波留魴放鱧若是者采其吉語娛我眉梨懲
彼殺機戒茲子弟播三田之種閣上巡觀賡七月之章房中屬和
未嘗不集吉門之慶極幽居之致焉定省之暇時而出遊則峨眉
當其前青城出其後大江流其左資水徑其西解角之鹿可施鞍

橋浮鼻之牛以當舟楫餐雲欲曙之嶺采藥斜陽之洲團蕉數尺
非佞佛而可跌危梯百層不學仙而亦往閑防疾厄時覽方書偶
有篇題緘之經藏此則金門大隱不止平原玉筍真人復來弘景
若夫僕與足下之交道又可言焉僕處鳩音之里君居吠日之方
蛩距之合無由牛馬之風不及乃闕前一覲忽若素知飲中百篇
愛同前哲顧性嗤釋氏敢侈前因亦鄙道流詎云緣法靜言思之
迨卽吾儒之所謂如舊相識乎夫卅年成世足下旣近之僕則又
過半矣俯仰一身離合萬里常恐百年交道不盡然精氣不散當
成神明風車電帷來往不絕則僕與足下又何慮哉又何慮哉自
此之別一日之內僕眺朝陽君眺夕采一江之流君飲水源我飲
波末則亦何嘗有須臾之間遠近之殊哉保嗇神理時時讀書簡
牘不詳悉之于夢亮吉頓首頓首

城南初日照高樓樓下勞勞僕馬愁此日別君須握手古人見爾尙

低頭交同北郭推三世學許東方記十洲竟欲上天留不住夢魂隨
過古安州

附留別詩

張問陶

離筵相對別情多曾與羣仙會大羅半世心交偏得爾十年詞筆
偶登科堅持壁壘爭詩律亂擲尊壘鬪酒魔忽送孤鴻天際去月
明千里意如何

年年奔走逐風塵又對春明折柳人蓋篋隨身千管秃鶉衣衝雪
一童貧山中酒熟還家好雲外心閒得句真肯學長卿西去日高
車駟馬嚇鄉鄰

一椽破屋寄三川累我西行欲上天十萬峯巒生足下尋常雲月
在眉前花時泥飲從田父雪夜狂歌理釣船只恐重來忘禮數倒
持手版謁同年

小碾輕車出鳳城東風煖到子規聲一官偶得常疑夢萬里能歸

豈好名細詠白華真樂事便言畫錦亦人情迴鞭忽下憐才淚八
百孤寒羨此行

袁大令枚病中以自挽詩索和率賦一篇寄呈

我生爲鮮民逮養苦未果孤真同孟陋各合作楊軻雖然檢此身欲
死尙不可唯公丈人行早結文字緣事勳與文章一一喜可傳卽論
委蛻期事亦須推袁幸公未死時我欲代公述二十厲志初七十著
書畢若論文福兼公可死者一早年預清班繼復作循吏風謠至今
留俎豆尙可冀若論位望亨公可死者二君卿取十妻諸葛得二男
身如柏枝強境若蔗尾甘若論居處優公可死者三十洲縱未遵五
嶽已畢至黃山武夷間垂老游復肆若論山水緣公可死者四拾遺
陪耒陽供奉隕江澣昌黎不攝生和仲備疾苦若論年命豐公可死
者五中書廿四考方鎮四十年汾陽處危疑長沙疾繇延身命匪不
達得不償失焉何如公致身半世臥巖谷入門與出門偃仰無不足

若論心志舒可死不止六世凡號爲儒家置公一編上者師公文次
學公詩篇下逮決科策誦之口流涎公名聾瞽知公貌僮媪識或疑
天上人或引作前哲寧知公尙在年僅七十七如此復不死寧能望
神仙勢必神采離形作塊壘牽與其臥閨闈曷若墟塚間顏公自爲
銘陶令自作詩頗怪同輩中一一不和之逮公始創例徧索執紼詞
我謂果愛公生并致脯奠及公能飲食一切口嘗徧庖人出新意尙
可令公羨又公在地上說鬼不肯休恐歸地下時萬鬼聲啾啾蓄憾
旣已深瓦礫伺間投公其見夢余聊可助一臂公雖塊然亡我尙有
生氣鬼車與鬼馬辟易一萬騎公今雖自挽我更欲速公公如讀之
竟大笑聲隆隆當嘉此狂生交道有始終

袁大令以辛亥除日復作告存詩七首索和戲加二絕奉答

赴書昨日過江東消息傳來總不同我信戴逵無死法越中名士勝

吳中

時誤傳錢少宗伯載赴書至京

儻來勲業那堪論
絲竹東山道自尊
却見白鷄原不礙
故應久占謝公墩

已抵紅塵一百齡
名山五十載韜形
如何更展人間限
天上多應妒歲星

告存纔接七篇詩
此語賓朋喜可知
誰識仙山樓閣裏
有人望眼欲穿時

準擬銘旌已欲題
無端白日忽回西
生天成佛都應後
莫哂精廬孟會稽

耆舊居然壓輩羣
老來心力著書勤
十分彭祖當時壽
却愧公還未一分

人嫌不及此偏過
恐是神仙受折磨
謫籍至今填未滿
周妻何肉累公多

名山咫尺好攀躋
趁此春江綠欲迷
畢竟太真年命脆
請公來日試

然犀

脫手新詩衆競鈔豐干莫怪舌偏饒兩篇多作非無意先代巫咸賦

九招

里中十二月詞

辛亥小除夕避債沙河門側因憶里中舊遊及諸勝事爰成十二

月詞十二首

西瀛里畔人聲沸翠色染天紅蓋地排門剝粉書豐年屋後水扉燈

影連橋上人橋下艇不斷橈聲兼帽影東迎邗水西接城夾河祇聞

爆竹聲料量香燭南街口共向喜神方上走元宵節近當出遊却喜

客歲晴中秋吾鄉西瀛里中為百貨叢集之所臨河一帶半皆染坊屋上飛竿插天大率皆曝布廊也除夕爆竹聲尤盛詰

朝紅綠紙積地常至寸許又里諺云中秋雨打上元燈若隔歲中秋晴則元夕月必大好以此為驗十常不失一

右正月

神祠昨日鐙花笑屈指社公生日到龍鐙九節菱滿池就近還參各

神廟後街絲管聲沸天
鐙影直接斜橋邊
衣香隊裏春雲熱
謁廟仍須夜深出
鐙光疎處穿市過
社公不拜拜社婆
延回只說歸塗枉
朱

雀橋邊水聲響笑指鄰家姊妹言
百花生日還相訪
里中近年尤重社公生日鐙火

較元宵更盛城內外社公祠數十區惟北後街及斜橋二處最修整至期絲竹聲每徹夜不絕傾城士女皆于更定後出遊朱雀橋在玉

梅橋東過橋卽楊氏園亭也

右二月

二月二過三月三
薺花黃徧穿單衫
單衫何處尋春好
先踏艤舟亭

畔草紅梅閣接迎春堂
一路草香花亦香
紅牆缺處危樓突
正好滿

塘春水活賣花擔子
不得停昨日寒食
今清明花間古廟門
開早一

片香煙接花裊傾城人
出不遽歸緩步却從城北
回君不見興闌欲

訪閒桃李却惜山莊前
已圯
里諺云三月三薺菜花兒單布衫艤舟亭紅梅閣迎春堂皆在城東距城北三

里有青山莊爲前明吳氏別墅林壑之勝甲于郡中雍正中張布政廷居之後籍入官爲里中富民所有乾隆三十一二年其家中落遂

拆以償逋今久鞠爲茂草矣

右三月

玫瑰花香一城嬾數起數眠天不晚城彎北去覓午涼柳線亂將行
客縮鱗魚上市值萬錢山筍轉嫩櫻桃鮮微泉閣枕緩雲閣商略欲
啓荼靡筵廉纖梅雨纔經夕已報江波入三尺趙家樓上望欲驚畫
舫却與樓窗平

出東門至天寧寺後有曲巷一條名城彎夏中納涼所也微泉閣在縣學西侍御史董玉虬別業今歸趙

氏緩雲閣在雲渡東舊屬呂氏今圯

右四月

柁工昨日支關鈔訝得龍頭出神廟龍身沉處奠酒肴頃刻龍尾波
心搖六龍城古龍舟七城北東西按方色一層彩纈燈一層水面徑
看高百尺晏公祠外臨河澣朔日先聞賽神鼓三元高閣颭錦標聯
尾北出迎春橋飛竿快槳都成隊船上樓中卷簾對打招要取波面
寬一舸前呼百船退雲溪半里樓接天一河鐙光人不眠龍頭纔過
看龍尾四面十番絃索起洞庭楊梅甜不酸更有盧橘堆成盤舵樓

吳姬約早餐港口昨到江魚船每歲競渡時一龍舟例支許墅關稅銀十餘兩常州城有六門舊號六龍

城余所見龍舟有大小青大小白及烏龍金龍五色龍凡七午節後篙工取大石沉舟身于河底而以龍頭藏廟中至用時乃迎取焉晏

公祠三元閣皆在雲溪

右五月

萬花開後園林老日永如年客來少銀衫斗笠思出遊城北水上多

危樓窗櫺豁處天光現十頃荷香撲人面東西兩水夾寺門水綠欲

把門扉吞紅闌幾曲生林杪屋古似巢僧若鳥閒僧喚客客不應小

艇出市前溪濛晚涼莫向閒街走九柏山房門新酒城北放生菴內外有池寬至十

數頃荷花甚盛菴南卽元處士謝應芳祠祠後有樓甚涼敞又西行數十步卽楊進士倫九柏山房也

右六月

七月七日侵曉妝牛郎廟中燒股香回塗更把裙衫整織女橋邊鑒

春影彎彎新月看至圓結伴好上臨河船東塘北岸人爭覩倚艇低

頭放鐙去今年鐙樣人更誇飄出萬朵紅荷花年年歲歲祈無疾自

信今宵鬼緣結君不見東家女兒結束工染得指甲如花紅斜簪茉莉作旛勝鬢影過處饒香風又不見西家女兒還未嫁閉戶挑燈坐深夜神燈社火總不看獨望銀河占米價北門外十里有牛郎廟旁一木橋俗名爲織女橋中元日土俗普放河燈又多市楮幣于深夜燒之名結鬼緣七夕前後天河隱不見者常十數日吳俗以日數之多寡驗米價貴賤多不爽

右七月

十三月如元宵十四十五光尤饒蒹葭莊來鶴莊更有蘆墅羨堪嘗歸來樓上開扉望正見光從海門上江波濯月月更涼千戶萬戶堆新霜層樓影向三更直高下棱棱瓦檐濕更殘女伴出走橋行過八字剛三條賴顏難却鄰姬請更走烏衣及紅杏莊家燈謎猜不完曲巷更有花燈看打十番跳百索攔路復看飛鼠落顏鞋纔了復墮釵

南街怯行行北街君不見團團明月方迎面一入采棚天不見蒹葭來鶴

二莊桂花最盛蘆墅在北門外產菱尤佳入字橋在城東與紅橋及元豐橋斜對烏衣紅杏二橋名在邗溪上近年中秋燈謎盛行己酉庚戌莊公子達吉在里門延名士十數人專司其事以是所製尤膾炙人口中秋前二日恭值萬壽聖節居民皆結采爲棚張燈至

五晝夜大街及
西瀛里尤盛

右八月

中秋說餅辰重九題糕節汪三湯餅倪婆婆糕却與龔丸作三絕出門
衣袂多北風偏向南郭聽齋鐘再轉僻寺來城東驚聞天半人聲雜
一郡人登七層塔攔門一客索一錢鼓勢直上浮屠顛窗櫺八扇迷
方向咳吐皆飛鳥巢上前行如挽後若推足底復有人頭來飛梯盡
處波如鏡坐久蒲團始神定閒尋菊種來僧房更借苦茗澆詩腸歸
途忽見紅鐙簇禮斗筵前夜焚籙雲溪倪婆婆製糕葛仙橋汪三製餅皆舊有名近廚人龔玉魁製粉丸
亦精清涼寺在南郭外九月中香會頗盛自城南至東郭必出崇慶
寺前太平寺在東郭有塔七層爲九日登高處里中人常以九月禮
斗城東毘耶室塔
隱山房皆禮斗壇

右九月

一花一草都無色黃葉砌邊堆數尺下元會好強出遊乍冷客亦披
輕裘蕭辰欲借笙歌暖排得雲車大街滿迎神曲好還送神香篆影

裏回陽春馬山紫蟹螯鸚蕩青魚尾屈指消寒會當起舍南竹屋梅
 乍開掃室便已安尊疊趙君飽噉吳君飲更有蔣君工食品頴州酒
 政推嚴明不到四更杯不停君不見坐中有客歸何遽欲附租船上
 墳去里中賽神以清明中元下元三節屆期城隍神皆詣北壇行禮
 出入儀從甚盛兼設雲車臺閣故事傾城士女咸設幕觀焉蟹
 產太湖者佳鸚蕩在西門外五里產魚最多里中諸老輩趙丈繩男
 食量兼人吳上舍祖健稱豪飲蔣太守能昌酒政尤嚴舍南竹屋則
 余侍御舅氏書舍也食品每出新意他人
 做之皆不及又吾鄉展墓以清明及十月

右十月

租船歸日盈筐載精穀上倉粗入碓嚴寒料理及齋鹽買得城南幾
 挑菜花豬成隊羊一羣冬至日前商祀神蜡筵開處賓朋滿紅燭壓
 簾行酒緩清歌小部方上場門外嫁女笙簫忙君不見東鄰贅壻仍
 開讌自說豐年百般便連天爆竹西半城一月不停歌吹聲樂工醺
 醺里巫飽却詡今年日辰好吳俗于冬日預蓄菜數百斤以鹽漬之
 可經久不壞里中富人于冬至後報賽
名曰蜡筵是日必徧請親朋又里俗婚嫁事必擇冬季若
 遇豐歲則更多亦昔人霜降逆女水判而止之遺意也

右十一月

桃仁滿把糖盈掬臘八家家煑膏粥袈裟三百紅滿街穿徧一城云
化齋闌干影裏飛花爆相約廿三先祀竈神祇五路土五方屋後有
井堂前倉小兒新年上學堂牲醴并欲祠文昌年殘百物先儲蓄家
燕賓筵喜俱足君不見書生生計絕可憐研斷凍墨書春聯臘月八日
果煑粥并饋親鄰城東天寧寺僧徒常三百餘人臘月初則空寺盡
出名化臘八米祀竈舊以廿四日今則家計稍裕者皆移廿三土俗
以五路神為行人歲盡則祀五方土土人則加祀文昌朱衣歲
除寒士之最窘者恆設筆硯于通衢代寫春聯可日得數百錢

右十二月

卷施閣詩卷第十

卷之四

古十一

古十一

卷施閣詩卷第十一

陽湖洪亮吉著

五經聯騎集

辛亥壬子

雨窗讀何水部道生詩適有饋蟹者率賦一首卽題卷末

平明生輕寒秋雨閉門大窗風扇如鬼梢入竹數個起來天冥冥枯
坐無一做攫得一本詩中邊頁先破案頭光正黑捉就窗隙臥讀一
首兩首大叫急起坐波濤欲掀屋日月忽顛簸無端蟠虹霓光怪生
土莖排空一枝筆五岳透皆過凝然七字出重欲百馬馱又如五兵
利當者無不挫讀時忽狂笑一屋悉驚邏一句復一滴恍與檐漏和
雖然萬言富無救一日餓忽然敲門來送蟹有鄰左是時雖正晝牆
外黑若磨安排醋盈盞疊取薑桂剉呼童急斟酒好句我欲賀遺經
嬾書寫卽此當清課

時爲幼子
書爾雅

讀詩一兩卷食蟹七八個快哉復快

哉屋漏頂上墮

自蘆溝橋西入山至花犁坎道中作

山程七十里半道馬已死

時同行劉檢討
湛齋馬忽斃

主人寄坐僕告歸一馬乃

載三人來前山蒼蒼月初出對面一山看落日微紅入水尚有光水
底已復鋪新黃山風斜衝兩山口倦客欲眠山石走一峯榭葉下趁
人車上鈴鐸聲疑嗔客行無糧馬無草三兩人家閉門早却怪前頭
紅樹多橐駝不到山初好

自慧聚寺北行歷化陽朝陽觀音諸洞晚上極樂峯作

峯形南北殊凹凸入地上天皆一日潛行五里不見天蠟炬光遠空
浮煙莓苔森森綠疑夢蝙蝠手捫皆不動一風衝出微帶腥足底萬
竅聲俱鳴好奇徑欲窮顛末行僮失聲炬將滅四人急轉我後來風
黑恍有千人追是時屈指當交酉出洞見天天尚晝飲泉百盞神始
清坐調鼻息方遠行樹巔斜行途轉窄鴉點撲人如雨黑東行一洞
勢較低一洞復出清泉西斜陽沉沉嶺頭落客意極疲龕極樂下方

已黑天頂青側帽恐礙當頭星

自潭柘寺至龍潭久憩

一亭蓋清泉再轉泉已失山腹空若囊時時怪風出青松高穴蒼鼠肥紅葉遠雜烏雞飛四山茫茫樵跡稀山翠沁骨思添衣斜陽下嶺客上山山寺防虎門先關坡陀百轉行客餓林果却從頭上墮

宿慧聚寺山房

寺門望殿樓樓迥若天上一松蟠殿角高復出千丈山僧導客行不休石屋轉出青松頭客行開窗玩松頂下視僧房若居井秋衾鋪月夢不成一夜枕上皆松聲松耶雲耶不能省月裏千重百重影三更闢戶禮上真北斗正南來瞰人

日午抵潭柘寺至猗玗亭久坐

到門諸峯低青翠收一殿直上百級奇雲紅撲人面穿廊入廚院百匝水聲徧危亭圍衆綠當午無所見林杪開北風晴陽落如綫山牕

當殿展涼燠亦時變朝饑誰可喻山果幸時薦吳筠雖說餅束晷仍

賦麪臥枕明昌碑狂思永和讌

亭有流觴曲水故云

慧聚寺夜起行馬鞍山麓

三更東峯明斜月逗林左連閨無人聲獨往意亦果北戶昨已扃山
風自開鎖梢南通一徑細路出牆堞碧樹合作屏黃雲散成朶低同
馴鹿步高與彌勒坐一寺十數廊閒行止餘我徘徊念儔侶水黑月
已墮歸路愁徑昏山榴綻如火

山房與邵侍講晉涵話舊兼呈曹侍御錫齡劉檢討錫五張運判道
渥

憶昨從君遊青山謝公宅五更搖夢醒君苦行不得出門殘月尙在
牆照見四野黃花黃傍花前行衣袂香綠鬢欲與花爭光看山百度
花千度鏡裏朱顏已非故五嶽雖成汗漫遊一春每被風光誤洪厓
仙人寧足誇君亦嬾種青門瓜雲山無意忽相合且拾山果烹谿茶

對床七輩今誰似可惜三人已前死壬辰三月同遊青山七人今朱竹君先生張上舍方海黃二尹

仲則並下世學士才名上舍詩還餘李嶠真才子今日張顛有替人曹劉

聯轡出風塵青松白石談遙夜豔李夭桃訂好春時約明歲三月重遊

歸途遊石鏡山作

馬行半日坡皆陡榭葉隨風出林走桑乾河北飲馬時却望樹色還
參差平沙茫茫埋馬膝復有一山當路出遠尋千級到寺巔寺外城
堞皆衝天紅林蕭疎日光薄破樓無鐘殿扉落庭隅堆草濕一邊夜
半或有山魃眠

梧桐葉

梧桐葉秋來大如掌肅肅西風催蕭蕭打門響

何工部道生招飲卽席羅山人聘曹指揮銳張運判道渥合作一圖

名秋堂雅集因繫以詩

一人畫山一人畫樹旁有六七人嚶嚶屋中住曹興宗昔時畫馬今

畫松羅江東畫人不工畫鬼工張風子畫即有風蕩葉恍起秋堂中

兵曹詩百篇法時舍人酒一斗劉湛比部談天李石我义手屋頭有

樹樹杪山却怪樹底門常關晚晴巷口車聲接一徑呼僮掃紅葉斜

陽入樹留一分道遠客欲趨城門時帆居君不見山雛窺客喜復嗔

認是昨日遊山人

遊古寺

入門悄無人北風吹小住誰肯揖先生長身一松樹

朱孝女奉親圖

孝女婺源人誓志不嫁以養父母父亡事母幾二十年及母沒孝

女年已五十依兄弟以居繪父母象懸室中朝夕事之如生其兄

某為作奉親圖索詩云爾

二十事父母三十依偏親四十作藐孤哀哀逮晨昏父亡事母母亦

亡高齋却掃為影堂影堂西偏兒所住生死不離親一步行年五十

不下堂父母以外無尊章畫師敬復瞻顏色髮白未笄何可得椿兮
萱兮合作圖旁有几榻兼詩書君不見孝可生孝可死由周秦逮今
此伊誰作配光青史北宮之女嬰兒子

歲暮飲酒詩十篇

一屋無閒人勉復出門走一巷無閒人驅車出坊口東西街十里排
戶款良友皆云出門久十至九不偶沿路爆竹聲兒童拍雙手車來
仍復返斜日已交酉一世無閒人誰同飲盃酒

飲酒或不樂時時復嘯歌讀書有時疲披牋亦吟哦設榻書案旁所
以消睡魔房廊亦周行時還撫庭柯大抵一日中良朋間經過飲酒
時究少讀書時究多

自爲京朝官童僕色不展連晨朔風至寒色到雞犬吳奴昨告去朱
戶別思款今辰關右僕衣被亦將捲欲留心不忍各爲計安善十年
依倚久一日忽辭遠周親復交詈食窘衣不暖笑讀東觀書何如北

門管

學士不能飲而時負酒錢

法時帆喜招客

侍講久輟詩

邵二雲

獨喜客贈篇孝

廉耽宵吟

王楊甫

日出擁被眠廣文退食遲

汪劍潭

負券愁逼年皆隔十

里遙誰能比唵肩歡棕杳難尋俗累苦復牽惟應孫比部

淵如

時闖

笙歌筵

比鄰指揮署對戶車羸坊鄰雞第一聲馬嘶人亦忙否則公案側貫

索聲琅琅羣動既已繁吾行起徬徨門戶尙未開初日上北牆窺廚

炊煙稀正苦瓶無糧吾師昔人言冬日則飲湯

歸鴉值歸鴉十十復五五酒人憶酒人相思倍云苦寥寥心一寸誰

復可傾吐欲因西逝日寄此蜀江滸江水杳以深高原復相阻思君

不能見夜起聽更鼓安得雙鯉來奇篇概今古

此首寄張同年船山

屋頭無星辰積晦已三夕凌晨先習霰騎馬懶入直生徒來饋歲野

鶩間鮮鯽更有酒一樽聊云破岑寂雖通德里差比草玄宅呼兒

開美醞小酌經案側正好無俗人門前雪盈尺

人皆處城西我獨居城東城西人不來賓坐時時空非徒息紛紜藉
臥篇籍中日盱弱弟歸粥飯喜與同兒曹誦經餘得句輒復工爲善
無近名我師陳仲弓干祿不欲多我法邴曼容興至卽舉杯消磨寺
樓鐘

昨來京華居闢室作影堂晨昏覲吾親旬朔申辦香祿苦不逮親時
時我心傷幸伴弱弟居諸甥亦隨行誨以勤讀書庶幾能顯揚歲晏
風雪中懷人益傍徨一舅依郭門兩姊居江鄉何時能合并築室先
隴旁

向生無他奇貧甚益偃蹇人言年歲竟屏當無一件開函展然笑一
室尙仰偃泉明乞食詩吾行恐難免欣然喻妻子且設歲除宴爲歡
極今日先把百愁遣待過元日朝衣裘亦堪典

歲除以酒炙酹亡僕窺園并繫以詩

自余爲諸生汝卽侍左右皖江隨學使姑熟依太守兩年居白下一
載住京口逮擢明經科相從浙東走窮冬遭大故九死返林藪汝也
痛哭隨衣穿露跟肘經年聖廬內料理及糴漚一僕乘間逃蓬門汝
兼守余心感其義待汝乃不苟除喪來日下百事益紛糅春秋兩闈
試十上九顛踣屈指十五年所值苦不偶親知久相弃汝乃誓不負
落落十數州商量覓升黜遊梁才匝歲客陝時最久中謀金半百爲
汝歸娶婦南下不半年長饑婦先詬踉蹌復追及訴室有病母汝才
工料事兼復習科蚪每寫百幅書人疑出余手余交徧區宇能一數
某某孫黃暨崔趙識我交最厚不來同我憶來卽具尊酒各能諳食
性默爲理菘韭武昌城郭外客歲歷申酉地也南北衝邨墟雜花柳
平生汝頗謹苦被僚僕誘到此亦有由都緣婦奇醜妄心希外遇或
可副箕帚放艇夜渡江時時逐鷄狗衙推頻乘隙間值墨尿毆有時
方縱笑遭我出行陡厲色一禁之鞭笞願甘受扶疴方就道風雪復

連嘸余來幸通籍解汝顏色愀遣歸迎眷屬兼爲覓糧糗汝時雖已
病聞語尙抖擻今年附舟至面色益昏黝殷勤覓醫藥病早醫乃後
短至節氣長時時伏床嘔屏除諸食品日僅啖羨藕沈疴由自取將
死乃一剖彌留三兩日作札呼汝舅矐目不得言頭從枕邊叩卅年
爲一世誰識汝不壽汝行雖廁僕汝義實兼友汝不善攝生吾行又
誰咎急爲馳惡耗書至月已九汝母哭定癡汝父顏亦叟伶仃遺弱
女學語未離殼一棺雖草草必爲枕邱首除夕酹一杯傷心汝知否
小除日寓齋卷施閣祭詩作

去年祭詩日同館挈仙史

謂張船山

今年祭詩時闔戶僅兒子一兒讀詩

業未醇一兒學選粗有文呼來筵上作陪祭不向屋外招詩人事功
一歲慚何有詩一百篇文十首借之作達亦可憐敢向衆中誇不朽
此筵設自我此例舉自唐浪仙詩句鏤肝腎積歲預恐心神戕我詩
直欲寫胸臆元氣未勵何由傷雖然一日間檢韻亦已忙灤河仙鹿

北谷羊作脯聊潤詩人腸南鄰詬誶聲北巷市塵沸吾廬雖冷一事
無尤喜門無索租吏一詩焚筵前一詩寄蜀中狂生避債作臺後預
想掩戶浮千鐘我行亦返卷施谷欲仿長江作詩屋更邀諸老同祭
詩短趙狂孫附癘陸陸秀才繼輅年尚幼已工詩兒子友也

小除夕從家大人祭詩歌

飴孫

兒時放塾庭前過重慈提攜侍行坐桑陰屋側隨嬉遊手捧新詩
當餘課十年負笈從師遊樓前學詠珊瑚鉤閒中分賦荷奇賞出
語不肯同朋儔歸來朗誦喜阿母慈顏一笑開眉愁歲除亦解束
詩卷雅伴積軸堆床頭屋傍十畝富風景絕愛春晚兼新秋偶然
好句覺自得僮僕往往噓吁嚟艤舟亭畔蠡河地花落花開總能
記年華二十春二分入世文章敢遊戲春明北上隨慈親歲星在
亥月在辰曾登鳧繹望泰岱更喜擊楫經渾淪看山看水不相識
問名一一窮本根祝風咒雨一枝筆行客舟子驚奇珍燕中隨宦

樂趨侍一卷兀兀隨晨昏過庭重誠爾小子學詩一語言重申閒
堂月好命分賦擘牋搦管噓陽春一篇偶合長者笑一篇若拙長
者嗔弟昆相賀復相戒冥索時復煩心神金臺芍藥闌河柳快飲
百杯詩百首夜闌掩戶時朗吟一屋兒童都上口卷施閣集排西
東更列酒脯酬天工庭除恪侍作陪祭缸穗凝綠花冥濛太華培
塿並時列光氣凌亂殊青紅瓣香縱不在前哲敢說家學能兼通
他年倘得爛一藝略比過邁隨坡公

花朝日獨遊二閨歸適馮編修集梧得田侍郎雯大通橋秋泛卷子
索題因率書長句于後

花朝日展重陽圖百年風光今在無蓼紅荇碧色不減只有卷裏人
俱徂河流北去都成岸驢背紅塵亦頻換誰從物外觀古今石塔亭
亭峙天半惜哉秋好何如春津水乍綠無纖塵獨遊徑苦意蕭瑟坐
恨不見當時人百年似此清遊寡都策疲驢不騎馬沿堤正好迎面

風攬得柳絲盈一把米船東來畫舸西百丈往往牽朱旗羣公觴詠
致堪樂可念民力東南疲君不見東南十郡沿江滸陟險誰憐挽輸
苦就中若以河沙量我亦江鄉一編戶田郎仁者固不同刻石告誠
垂橋東卽論文筆亦殊健赤幟已植騷壇中風光過眼誰能久感舊
懷人一杯酒春禽送客如有情約我重來看新柳

葉舍人雯移居觀菜園上街東作圖索詩爲賦長句

樓頭擘山作兩峯門外江漢流無窮先生開軒日正東繞宅萬樹桃
花紅朝烹武昌魚暮飲江渚酒卅年撰述無不有博士一官堪白首
無端欲將閶闔排愛看紅藥翻當階江頭池館覓人住反使援烏情
俱乖水程迢迢陸程少糧盡唯憑讀書飽津門橋南賃百驢囊金雖
少書有餘竭來都門三易居菜圃開處真吾廬盤盤老屋橫街後分
半貯書嫌不穀鎖廳退直事亦忙目力苦短書聲長談心時接北街
李小松編修聯句尙有南頭王惕夫孝廉君不見買山何似還山住一樣門前

幾株樹屋頭添得十丈塵失却雙川合流處

法學士式善屬題曹指揮銳張運判道渥所繪二卷子

蓬壺有仙人早歲卽食祿所居尤禁近

丹闕森在目官清饒暇日當午駐車軸閉門詩作命萬事不貯腹我
頃謂先生身外物皆足無須更誅茆天地卽詩屋苦吟朝復夜雙舉
日月燭惟愁鑿幽險或致鬼夜哭元氣不可漓期君返真璞詩名試
屈指海內不五六餘如閱傳舍彼此可駐宿賞心雖偶寄過眼亦苦
速茲龕庶突兀表以出檐木各山原有待壇坵今已築我亦念故居
卷施一隅谷

右詩龕圖

我家門前接早潮却行一里數十橋橋邊朱樓橋下艇千尺闌干漾
清影扶橋楊柳高接天樓上著客疑飛仙偶然窗際落高詠却惹遊
魚出波聽此橋此屋別幾年轉眼風月凋朱顏幸從塵外覓棲止百

步尙有泉濺濺車聲馬聲何日歇每遇橋名輒驚絕橋心何止無水流反惹岸塵高尺一先生詩思本最超更喜畫裏逢溪橋桃花溪南楊柳梢著一斗室如鴉巢我因鄉夢頻生妒君爲尋詩盍延佇徑攜秃筆及團蕉明日從君畫中住

右溪橋詩思圖

寒食出遊詞

牆頭無雨聲牆下無草色杏花一枝空復情薄暝吹香作寒食春衣初試欲出門東風吹塵日已昏天橋南去路如掌楊柳缺處藏春墳春墳高高盡尺五貼徧紙錢知有主橋西燕子飛不停啄得幾家墳上土啄殘墳上土來作梁間塵堂前宴客開酒樽卽是掃墓歸來人世間行樂皆如此一邊生人一邊死消沉代謝那得知冷眼却輸雙燕子東風吹塵日向西燕子亦逐遊蜂飛成團蝴蝶出門去屋角幾樹桃花低坡陀高低土無隙高種花枝下栽麥老翁往歲食有餘麥

穗旣黃桃實赤今年無雨桃少華麥隴三月飛黃沙關心歲事各惆
悵令我興盡思還家歸來閉戶同誰語一枕輕寒夜如許忽驚飛夢
到江南借得鶉鴝來喚雨

館僮折梨花一枝供膽瓶中率賦一絕

折枝聊復詡春華插向文窗影絳紗蝴蝶一雙來入定錯疑添得樹
頭花

三月廿三夜丁香花下獨坐適法學士式善以庚戌辛亥兩年所作
詩屬訂定因跋于後

丁香花底展君詩花穗千條月一絲句向卷中吟欲活月從窗裏墮
多時商量握管題長句珍重臨風嗅亞枝明日欲邀花下醉更憑殘
朶索新詞

三月晦前一日清曉獨遊法源寺看海棠花下值馮戶部敏昌因同
過寺旁亡友黃二景仁舊寓室已傾圯不可入感賦一首

出門誰是看花路縱馬直前知不誤斜行七里破曙光馬不識途能
嗅香平明一寺攔街出萬綠衝門馬驚逸客行下馬方拂塵花下已
有先來人羨君何止尋花早花氣入簾餐欲飽十分花事惜已過砌
下漸比枝頭多明朝更惜花無幾窗外怪風成陣起看花人老花莫
悲花下幾見常追隨不然花枝南頭兩間屋曾有詩魂抱花宿眠時
如鷗立如鶴看得開時復看落如今寂寞鎖幾春花屋祇當詩人墳
門闌雨圯紙窗破時聆唵聲夜深墮君行歎息欲出門我更代花招
客魂君不見客魂定在花深處怪底曙鴉啼不住

暇日校法學士式善張大令景運近詩率賦一篇代柬

我詩時苦難法詩時苦易若欲詩筆工兩人先易地張君下筆有古
人我詩下筆苦有我若論詩格超有人有我皆不可咄哉詩道匪易
言何況雅頌至此已及三千年誰無好句播人口大抵來往起滅一
一如雲煙天有日月星地有嶽與瀆筆端撼之不能動何以奴視荆

朱僕賁育若夫一身之內理更該心志各凌爍口眼各闔開不將我之心志口眼寄于古人四體百骸內始覺我與天地錯立成三才不能已于心乃復出諸口爲天地立言于我亦何有所溢于目乃復矢厥音爲山水寫照而我何容心一言二言精不磨千語萬語寧嫌多鋪牋直可概八極濡墨真欲成江河然後張君詩法君詩牛腰巨卷擲我我欲頂禮同所師且令前萬古與後萬古得我數輩中立藉可相支持

晦日卷施閣餞春偶賦十首

紅杏枝前拜朔來丁香花底餞春回冷官一月無餘事祇向疎闌數舉杯

經旬常坐此花前花幔愁開日影煎怪底鬢絲都不潤江南拋却已三年

白雲間有護花心時墮高枝作曉陰雲起接天花委地欲憑誰與判

升沉

細語檐鈴那得聞
城東風物感羈魂
春原一樣平如掌
只少菜花黃到門

雨絲真欲比黃金
尺五閑階草未侵
九十日春晴過了
却餘今日是春陰

春殘排日鎮飛沙
自掩疎櫺護碧紗
誰向燕南記風土
屋頭青草窹中花

閒禽多半向城東
花裏高樓面面通
不看生紅看生綠
天壇十里柳絲風

送春歸處敞斜扉
星露微茫點袂衣
休更梯牆看風色
明朝不放紙鳶飛

悟徹繁華總是空
興來擲笛自西東
尙餘幾尺斜陽影
要與春花鬥晚紅

一種心情小婢猜
四更猶自踏蒼苔
燕疑殘月衝簾出
那識幽人秉燭來

惜春詞

一風吹自東一雨來自西
風催花作塵雨催花作泥
作塵飛揚作泥定誰是
春花舊心性桃枝欲窺廊
柳枝欲窺樓窺廊見客行不休
樓上柳眼看春愁入門復出門
不見碧天色離離滿徑堆綠陰
明月欲從何地白
心長夜短睡不甘
曉夢亦復歸江南
夢時看花醒時叫芍藥如盤
向人笑

四月十三日張運判道渥招同王給諫友亮劉舍人錫五伊比部秉綬何水部道生胡文學翔雲陶上舍渙悅至海北寺街古藤書屋看花小集分韻得花字

一屋如舫門開斜半空吹香不見花
入門老榦復橫路根古半入鄰人家
抬頭花向竹梢颭一架正把天光遮
綠雲濛濛雜紫霞
花朵缺

處蜂爲衙花光豈止潤眉宇坐久衣上濃香加主人華筵開咄嗟有
畫可質無須賒巷南喧喧來酒車花片驚落隨飛鴉以花入酒沁齒
牙海濱石首津門蝦更喜蘆筍先抽芽年光慨如赴壑蛇春止一日
須豪奢十五日立夏握拳透爪拇陣譁上樹百徧能搔爬酒盞嵌入枝丫
杖不爾恐有旁人掣十三清宵月正華笑視竹影生窗紗忽思逃席
路復義一徑却好鳴官蛙到家冥冥吹曉笳袖底香氣留此些

自

御園回半道遊五塔寺寺中有古樹二株出檐幾數十丈花開覆屋
寺僧曰銀杏也爲賦一律

五塔寺邊雙樹奇馬行迂道款禪扉高枝似向雲中出落蕊猶能天
半飛清磬幾聲催夕照疎香十里點朝衣鄰齋東去春如海

寺旁卽極樂寺

牡丹蕃較爾濃陰覆院稀

廿二日侵曉偕孫大至豐臺看芍藥

馬聲嘶過柳梢頭宛轉雲容清淺流十畝竟從人外闢萬花如向鏡
中浮狂思海國春二月夢斷江城尺五樓小坐不妨遲日出滿汀濃
綠撲簾鉤

國花堂看牡丹

新綠叢邊競吐芽柳陰先爲障飛沙縱教風雨無寒色占得樓臺是
此花幾日酒中勞悵望有人簾底惜韶華如盤莫向閒時笑第一銷
魂數謝家

崇效寺看海棠

入寺先教蜂蝶忙殿前一樹倚朝陽若逢蜀客應回首不作秋花恐
斷腸夢雨心情初挹露冠春顏色肯施香紅紅白白看千朶莫更臨
風笑野棠

題阿少空彌達西尋河源卷子

鞭梢生層雲馬尾搖晴暉却行數里卽天上側帽忽礙星芒歸雲外

一株樹我疑是落棠不然何以夸父擲杖來茲方石林何周遭復疑
天盡處不然何以豎亥逡巡欲回步地高于天石壓雲北斗背上生
峻岫幾回洗眼望來路祇覺黃氣一縷從東奔漢家西南羌元人鄂
端尾去此不知凡有幾一條天路雖分明歷萬萬古無人經飲源三
日馬亦靈五色石上飛而行天河轉近滄溟遠三面銀光截雲斷行
經萬里無一人立久氣如春日煖乃知山經水注皆放哉眼底甫覓
真源回道逢青鳥亦不訝見慣捧日黃人來

圖中繪花翎黃馬挂

君不見相公

奉

命安河流怒濤如雷喧七州此時那識鑿空使藐爾已據天西頭一
尋其源一疏委同日奏功

天子喜雲梯關北望板桐只隔地中三萬里

立秋前一日法庶子式善邀諸同人至積水潭匯通寺泛舟觀荷分

韻得學字

入門一徑何磽确山鳥迎人如鼓樂繞垣三折到寺樓松櫟圍堂密
如幄是時正值新晴後破曙園亭色班駁張顛窗裏先揮翰以指擘
牋如可學卷頭祇寫波一層已覺清光動棖桷苦唵尙厭人聲雜逕
上高枝與商榷何生入座先邀客後日出遊期可確時約遊南西門外金尚書園亭
坡陀高下石百堆坐啖冰稜與瓜酌新蓮去酌桃芟核客未及餐遭
鳥啄纍纍紅果堆綠陰不問鄰家棗先撲誰人升屋思逃酒牆角銀
衫險遭捉樹頭啖果人不知風峭時時墮菱殼碧筒盃好長三尺荷
露殊清酒偏濁東西拇陣何喧雜熱暑欲將衣袖濯趁閒拉客凌波
去忽有小舟無木榷船頭三四船梢兩喜得吳儂體修掣豈惟快飲
荷盤露盤底嫩紅時一搦離離百頃生晚涼此樂江南庶堪較坐中
誰復唵詩健欲以持橈抵橫槊弄波東去香尤迥指爪時驚刺菱角
潭平日落風正生手撼前汀鷺絲覺

法學士以康熙己未鴻博前輩徐嘉炎等崇效寺雪公房探梅詩冊

索題爲賦一律

棗花寺裏看花日我後諸君祇百年見說雪公疑古佛却驚梅榦亦
飛仙馬蹄聲冷春三月鴻爪泥留尺五天莫晒阿儂題卷末後來應
又作前賢

卷施閣詩卷第十一